

蒙古 博明撰

(國學文庫第十六編)

西齋雜著二種

西齋偶得
鳳城瑣錄

中華民國二十三年十二月重印

據嘉慶年刊本

(每半葉十行每
行二十三字)

重印

(定價國幣七角五分)

西齋雜著二種序

西齋洗馬所著偶得三卷鳳城瑣錄一卷其瑣錄內攷正明詩綜諸條予嘗借錄之矣西齋姓博爾濟吉特氏祖邵穆布總督兩江西齋少承家世舊聞加以博學多識精思彊記其於經史詩文書畫藝術馬步射繙譯國書源流以及蒙古唐古忒諸字母無不貫串嫻習西齋與予生同里乾隆丁卯同舉鄉試壬申同中會試同出桐城張樹彤先生之門又同選庶常同授編修同直起居注同修續文獻通攷同教習癸未科庶吉士同官春坊中允其後予視學粵東西齋觀察粵西予寄詩有十同篇之詠蓋知西齋者莫予若也而西齋之卒予適出使江西西齋以所著此二編於疾革時始託同里邵楚帆給諫遂有脫誤不及盡爲訂正今又十餘年給諫將

爲付鈔而屬予序之給諫旣以瑣錄更寫淨本而於偶得一帙詳加分卷
惓惓致愼以求其必傳於後深可感也予篋中所舊錄攷正明詩綜數條
尙有與此稍出入者就其要者略增數字耳亦可以見西齋撰述之精博
當必不止於此卽以厲樊榭集所載賣元詩一律西齋尙能舉其家世來
歷而予今亦忘之矣憶嘗同在館下十餘年間讌談諧笑若筆之於冊皆
典故也而今僅於此雜著二種系之又良足悲也西齋外任雲南迤西道
內官兵部郎中而其在詞垣最久故仍稱西齋洗馬以志感舊之思云爾
嘉慶五年夏五月北平翁方綱

附識

此藁在楚帆篋十餘年矣楚帆嘗與西齋同官共曹每惓念故交必舉

此編以計日付剛爲快今白山心齋給諫與楚帆同直亟取以梓之楚
帆語予曰心齋名廣公兩使南漕將俶裝亟以表章婦翁遺藁爲先務宜
并識以傳之是日雪後峭寒楚帆手此冊目光炯然直與遺墨精神焚
香淡對不偶然也十月四日方綱又書

予自髫年侍先人卽獲聞緒論於辨證考訂之事每心志之長得肆力于學因知今之考證者非衍舊說卽涉穿鑿附會比歲亦有所論述然於是二者恆謹持之浸久成帙錄之以備遺忘乾隆三十八年歲次昭陽大荒落孟秋月上浣蒙古博明希哲氏自敘

西齋雜著二種目錄

西齋偶得卷上……………一

西齋偶得卷中……………三九

西齋偶得卷下……………五七

鳳城瑣錄……………一二五

西齋偶得卷上

遼金國名

遼爲契丹金爲女直接契丹本名乃契塔特女直係由女真由朱里真迭改其本音乃朱里扯特見元祕史蒙古文今蒙古人猶以是呼之

蒙古呼漢人

蒙古人呼漢人爲契塔特蓋蒙古初爲忙古部越在大漠北至後五代時始通中夏惟時燕雲十六州皆屬契丹故以遼國名稱之

西洋呼中國

西洋呼中國爲吉代蓋亦契丹之訛

蒙古 博明 希哲



遼國姓

金元子姓於今繁矣遼去金未遠何至靡有子遺耶律金史本作移刺元
漑然居士集亦然按遼亡其後分而爲二一入西夏一入金今之伊刺里
氏其族衆矣豈非其裔耶

西夏

元祕史稱西夏曰唐兀然則吐蕃之爲唐兀特久矣但未見於載紀耳

紀粵滇水

粵西兩江皆發源滇黔左江來自百色者自交趾者自高廉者右江自泗
城者自獨山古州者自楚南者五金爐竇淘洗之餘毒蛇怪禽飲浴之瀝
皆足病人方春時雨九夏積霖滌萬山之穢歸於大壑尤黃濁澄以礬石

煎之百沸尙時作脹瀉彼土人者見有涪蹄無不掬而飲者於嘔其不病而斃者幾希

粵西雨

天泉爲茗戰上品粵獨不可飲山氣上歊炎景下偪十日不雨則峯腰積霧逾辰不散或蒸而爲瘴矣若以瀹茗是引瘴液入腑焦也曾遍告同人以爲戒

羅盤

舟中輿中必置指南斯方向不迷然瞻矚之下縱極分割亦屬臆膜若以午向前子向後丁未坤申庚酉辛戌乾亥壬移向左癸丑艮寅甲卯乙辰巽巳丙移向右是羅經而逆行則鍼鋒所指之處卽所向之方纖毫無舛一觀

卽得或曰此卽海舶之鍼盤予未浮溟渤將以質諸乘桴者

遼京

遼太祖以迭刺部代遙輦氏起松漠建皇都併渤海得城市之居百有三
太宗立晉有幽涿等十六州兼古幽并營之地神冊三年始城松漠天顯
十三年更皇都名爲上京臨潢府是爲漢遼東郡西安平之地在今蒙古
翁牛特巴林阿祿科爾沁境內神冊四年葺高麗地遼陽故城爲東京遼
陽府卽今舊遼陽地方聖宗統和二十四年城漢新平縣饒樂河之南温
渝之北地名中京大定府按古今圖冊集成其地當在今義州北邊外其南京析津府幽州也
太宗時改西京大同府石晉賂地興宗重熙十年升此遼之五京也

金京都

金起海古之地爲按出虎水源國初稱爲內地熙宗天眷元年號上京海陵遷都於燕削上京號止稱會寧府稱爲國中者以違制論世宗大定十三年七月復爲上京按古今圖書集成今寧古塔有古城內有宮殿當是南京開封府卽宋國都海陵貞元元年改南京北京大定府卽遼中京貞元元年改其東西二京率由遼舊中都大興府卽遼南京初號燕京海陵定都以燕爲列國號乃改稱此金之五京一都也其臨潢府國初亦不變天德三年罷置轉運司

明長平公主名

吳梅村長平公主輓詩註云公主名徽媿見孫承澤春明夢餘錄此乃大謬稽錄云崇禎元年封帝女徽媿爲樂安長公主按樂安公主乃李康妃所生所謂皇八妹是也錄原不錯特妹字訛寫女字耳再光宗諸女有名

徽姪徽奶者更無姑姪同行之理梅村爲長字所誤耳豈不知明制帝姑稱大長公主帝姊妹稱長公主耶習典故如梅村尙有此誤

兩關

明末事多不詳紀其東方所最重者莫若兩關其時扈倫四部雄長東方南關者烏剌那拉氏世由鎮南關通貢北關則葉河那拉氏自祝鞏額至青嘉努揚嘉努二貝勒由鴉鵲關通貢厥後烏剌分枝於哈達有名萬者極忠誠明封爲龍虎將軍稱之曰王台

貓

宋牧仲筠廊偶筆載前朝大內貓犬皆有官名食俸中貴養者常呼貓爲老爺考明宮中所畜貓皆有名其牡者呼某小厮牝者呼某丫頭驢者呼

某老爹非老爺也亦無俸但給抹布小刀耳御乘馬亦有給抹布小刀者

三江

三江者混同江鴨綠江黑龍江本係三水而古人多混按混同江今名松花江唐名速末水又名宋瓦江又名鴨子河鴨綠江古名馬訾水又名鹽南水乃松漠紀聞契丹國志大金國志則云黑水發源長白山是誤混同江爲黑龍江矣明一統志旣載松花江矣復云混同江在開原城北是誤以船廠城南之虎爾哈河爲混同江矣遼史太平四年改鴨子河爲混同江金史世紀云混同江一名黑龍江是合鴨子混同黑龍爲一矣地里志肇州始興縣有鴨子河黑龍江上京路有混同江鴨子河宋瓦江則又分一混同江爲四矣不可不辨

阿爾楚哈

阿爾楚哈乃元肇州地今阿爾楚哈有廢城卽肇州故城也

鬱棲

鬱棲乃棄污所積之地俗所謂糞草堆也二字甚雅出酉陽雜俎

解菜

南史潘妃亡東昏蔬膳積旬左右闍豎共營肴饍曰爲天子解菜

陽馬

何平叔景福殿賦云承以陽馬接以方員註陽馬四阿長桁也今殿宇四
飛檐承椽之斜木其形上圭下平本大末小今算家有陽馬形

天香樓雜說訂誤

偶讀虞虹升天香樓雜說其謬誤甚多隨誌於此其書首載天行以爲七政確是右旋無疑夫七政日在人目中皆由東徂西從無反東之日右行之說乃算家推步之捷法非實也今更有天靜地旋之說彼皆以巧思爲密合耳未可據以爲論又言日食者乃日月合度月在日下陽上陰下此爲否卦月食者乃日月對度日與月衝陰上陽下此爲泰卦陰陽迭運否泰相巡萬物絪縕俱從此出此則大謬合度對衝乃朔望之常薄蝕則損其光矣天變見於上人事應於下故人君引以爲儆不委之於一定之數如虞所云不幾甚於天變不足畏之言乎至論雷電一則甚有所見惟言雷祇一聲則不然蓋雷聲非若爆竹一鳴乃如炭火之爆一連數聲則其響旋繞其播鼓細聽卽知矣古人談天文者惟朱子實有見解至有明諸

公牽扯陰陽其不可解處則以理言彌縫全無理會此亦相類又論塔影云夢溪筆談論牕隙中樓塔之影中間爲牕所束則皆倒垂客座贅語亦云塔影無不倒者且云凡物之影透在隙中必與其形相違塔本正也而影倒卽如飛鳥之影鳥東飛則隙中之影必西逝與塔影相同二說似矣而其所以然之理則皆懵焉余嘗遊眞如寺大殿之後西次間北向一小室深僅六七尺其南卽大殿之牆北首臨簷際上截用木板蔽風雨下截作牆板之近牆處有一小隙僅四五寸闊半之余同數人從旁一門入室卽闔門視之天光映於壁上塔影宛然倒焉初甚駭異沈思久之忽然了悟此中自有至理固極平常也時方仲夏日行北陸又值舖時塔在日南日自北照之影落塔南地上室中壁上之天光乃卽塔南地上之日光倒

照室中者也地上塔影尖在南尾在北故壁上塔影尖在下尾在上然非有簷際木板束之則光散而不聚壁上必無塔影矣故板上留隙必須極小旁入之門亦須盡闔則光始自隙中吸入壁上耳又思冬月日行南陸日在塔南壁上必無塔影春秋之際必從早晚日出入時伺之蓋日出入時多在北方總須日在塔北而後壁上乃有塔影詢之寺僧答云果然此論亦似是而非蓋暗室唯受一竅之光四面之光皆從竅入上下左右互映是以塔影倒垂與日及地上之上無涉其妙理則在牆板之厚薄及牆與壁相距之遠近蓋板薄則光甚厚則光小若數寸之板指大之孔必不能成光以其不能四面掩映耳至牆與壁及塔皆須適合其尺寸可以算法得之此正如陽燧球與顯微鏡老昏眼鏡皆可取火其光聚處謂之礙

過此則倒試用鐙照其承光之處亦有倒垂火燄影也予嘗冬月居東房日高未起西牕外卽牆牆上之日光映窗射入屋之東壁適予首東以被覆首被露一孔則被中有圓光大如盃因呼一小童往來於東壁下被中光內卽一小人影往來影亦倒垂童由北而南影則由南而北確信此理爲不易其書復有陽燧一則其誤亦與此條同故不更及

物理

事有極易解而人多忽之者在昔人以人所習知而不著論浸久而人亦不察矣如孟子五十衣帛一說塾師皆囿圖講過且強爲之說如老人骨寒之類可爲齒冷不知戰國時中國原無今之綿布凡所謂布皆麻枲爲之此豈可禦老人之冬乎至經訓中誠酒之文無多而浮屠則引爲首戒

豈狂藥之不足虞乎蓋飲食之味日益加濃酒醴亦然周禮酒齊之法具在若今之火酒乃元人傳自西域而海舶所載葡萄紅毛尤醇濃辛螯非內地麩蘖所可比想彼土當時已然此皆無關理要而不知則不能得其解者也

飲食音樂

予嘗由今溯古極不同者莫衣冠若然無不可考至車服禮器兵甲鼎彝迄今尤燦然在目惟飲食音樂二者越數百年則全不可知周禮齊民要術唐人食譜已全不知何味卽東京夢華錄所紀汴城食料南渡後杭城所市食物張沂王進高宗食單大半不識其名又常見名人所刻書內有蒙古女真畏吾兒回回食物單思之亦不能入口至音樂尤易失傳三代

詩章漢人樂府唐人法部宋人詞易世則不能相承今所傳者惟元人南
北曲耳然觀明人說部亦謂當時已失元人音調矣予嘗謂今天下盛行
三事紹興酒崑腔曲馬弔戲皆起於明之中葉紹興酒始見於譚言長語
謂入口便螯味同燒刀此酒一出金華浙閩諸酒皆廢矣崑腔曲始於魏
良輔善於喉閒轉音此曲一出元人南北調皆廢矣馬弔戲始於南曲馬
湘蘭此戲一出葉子鬪虎皆廢矣後者不能復加越二百年此飲食音樂
之大交關也

潮汐

潮汐之理惟朱子月光之說的是千古不易蓋月爲太陰之精其本質原
是水毬陰體主靜受太陽之光則水氣上應而爲潮汐與方諸取水同一

妙理也其江河不潮者水出山閒地上流者得土氣多故化其潤下之鹹而爲稼穡之甘是失水之本性而所以養人者皆土性也雨露之水亦土氣蒸成故甘近有人自新疆來云其地諾爾中即海子也有潮汐者皆產鹽又按職方外紀坤輿圖說載亞細亞洲之西北多水湖有地中海等名亦有潮汐而產石鹽豈非確證

地震

地震爲地氣不寧聖祖御製幾暇格致餘編論其理最明切有據後閱職方外紀內載有一國其地多震動國主命鑿深數十丈大井百十眼其地卽寧豈非洩地氣之故歟

五品不孫

舊詞林典故載翰林衙門以科爲序五品以上則不拘故云五品不孫亦殊可笑

揖躬

揖與躬不同又手下膝爲揖俯身爲躬躬如半揖揖躬之別向亦知之而未識所本此條亦見舊詞林典故舊詞林典故爲明新建張文莊位爲掌院時所輯是可據以爲斷矣

狀元

本朝狀元自國初迄乾隆辛卯共五十一科山東二人直隸湖廣廣東陝西安徽各一人浙江十二人江蘇三十二人內徐州一人江寧二人松江一人鎮江三人揚州二人太倉州二人常州七人蘇州十四人且太倉初

固隸蘇州宜顧寧人先生云土產狀元也

翰林學士行次

香祖筆記云翰林掌院舊皆以學士兼禮部侍郎滿官漢官皆然自崑山徐相國以大學士兼掌桐城張相國以禮部尙書兼掌與往例不同然凡啓奏講書等事仍滿前漢後不論所居之本官也今長洲韓宗伯兼掌院事亦然余以乙亥年辦翰林院事時介景菴以禮侍虞山蔣相國以戶書兼掌亦滿前漢後蔣協辦仍未改蔣大拜則先蔣矣蔣歿繼之者爲錢塘梁相國以吏書亦滿先漢後至大拜後改焉前此則未暇考亦與當年小異

小說典故

小說傳奇所用典故亦必考而後知如所云天王堂炊餅等事亦有所本
余嘗閱宋人雜記知之後觀香祖筆記亦載因宋初有毘沙門天王助戰
事故令天下軍州祀之是先我而志之矣至炊餅則蒸餅也避仁宗嫌名
耳雖小事亦不可不考如此

人身之理

予前論水味甘鹹之理因思人身諸水皆鹹口水獨甘按醫經云口爲出
納之司地氣出焉地氣胃中土氣也故丹經以舌下爲華泉其取譬極爲
有理易云近取諸身人身肺之翕關如笙簧耳內小竅有薄皮幕焉此醫
師喻
嘉言
之說如鼓目光如鑑至目之五輪皆圓遠近大小升加之理皆由此出是
爲算學測量之根若眼鏡之用則因圓之有匾尖而損益之令適得其圓

也靜而驗之萬物之理何弗皆備

異草

余周歷滇粵所見草木之異狀者甚夥滇中有所謂錢麻者卽蕁麻也隰生如蓬蘽枝葉有刺著人肌膚卽癢痛不可當按西北方有所謂蝎子草者亦然然蝎子草以湯熟之則柔滑可食而蕁麻不可食至於斷腸草乃野葛也其枝葉與葛相似在粵中者黃花滇中者紅花與本草所紀無異黃花者毒甚一葉入口卽傾生紅花者毒較輕必食其初生之芽乃致殞命故粵西服毒者多斷腸草若滇則皆服草烏頭矣滇中又有異蟲乃樹枝所化其狀依然一樹枝朽杈卽爲足或三或四作螳螂行其頭尾折處痕跡猶存而頭生二小目馬誤食卽斃故亦曰斷腸草也

插漢

明史外國韃靼傳瓦剌可汗爲所部阿剌知院所殺韃靼部長孛來復攻阿剌求脫脫不花子麻兒可兒立之號小王子又嘉靖時小王子最富強控弦十餘萬多蓄貨貝稍厭兵乃徙幕東方稱土蠻分諸部落在西北邊者甚衆曰吉囊曰俺答者於小王子爲從父行又萬曆四十一年虎墩兔三犯遼東虎墩兔者居插漢地亦曰插漢兒王子元裔也其祖打來孫始駐牧宣塞外俺答方強懼爲所併乃徙帳於遼收福餘雜部數入掠薊西四傳至虎墩兔遂益盛其文義若係二部至李成梁傳則云插漢部長土蠻與從父黑石炭等勢方強則小王子卽土蠻卽插漢其世系始明按插哈兒世系拔圖猛克代音汗卽明人所呼爲小王子之始也子圖魯布孛

羅持孫博第阿拉克汗二世孫打來孫汗三世孫圖們汗卽明人呼爲土蠻者也四世孫布占色欽汗六世孫林丹虎圖克圖汗襲祖汗位卽虎墩兔也以一人所纂之書而前後互異幾至世系無考此蓋承王鴻緒初稿而誤者

魴

汝墳詩注魚勞則尾赤按魚無勞則尾赤之理魴卽今之鰱也鰱有二種一種赤尾者名火燒鰱以魴魚之赤尾比勞民之赭汗何必魚勞也哉

瘴

予在滇五載矣先此游於嶺南東西凡三省之山川經緯皆曾目擊而有會於心而因悟瘴癘之來蓋由於天地者半由於人者亦半按粵東會城

北極出地二十四度粵西及昆明皆二十六度有奇是距赤道亦只二十餘度其兩粵天氣酷熱滇獨常溫者滇省地獨高佛書所謂大幹是也與太陽熱限近故不寒地高則不熱至其平原則濕氣上騰陽炎近迫淫毒之氣鬱爲瘴矣其因乎人者則以天氣無寒人之腠理不密沴戾易於相干北人不習其水土干之尤易其中於人也熱盛者如疫濕盛者如瘧陰陽否隔故治之多不效故高山無瘴而平野多瘴卽一鄉一邑地勢稍高卑水土卽迥別本屬易知如明人廣志繹所論全無理解明人於所不知類以理言文之不足觀也

滇山

滇中山勢多由東北以趨西南其勢如堵如牆二山相隔之中多平原會

城及府縣治在平原者多至永昌及土司分地亦然自潞江至騰衝山凡七層潞江西岸大山一層也小金江二層也小隴川三層也沙木籠四層也戶拉薩山五層也千厓西山六層也巨石等關七層也其平原盡處復有山橫互是爲關隘會城以東直至交廣之間亦莫不然

滇水

滇大水凡五皆來自西藏極東者爲金沙江此在大幹之東故東流次西曰瀾滄江下游爲九龍江次西曰潞江亦曰怒江次西曰小金江次西曰大金沙江此卽今之戛鳩江直入南夷禹貢所謂黑水佛書所謂恒沙也以上四水在大幹之外故南流按西藏青海等西南流之大水凡六其一則中國河源也皆近在千里之內其地豈佛書所謂阿耨達池乎銀牛口

流入之菴伽河卽恒河頗胝獅子口流出之徒多河卽河源可考所謂金象口流出之信度河璫璃馬口流出之縛芻河則不可考矣

邊洲

西洋分域內爲五洲其書云歐羅巴洲利末亞洲傳之自古佛書順正理論亦云南瞻部洲有邊洲一名遮末羅洲二名筏羅遮羅丹洲此二洲中皆有人住亦此類也

滇種人

滇省夷人不下二三百種大約有五類大理蒙化永北及川中永寧爲白人一作爨是爲古六詔遺民廣南則有儂民永昌順寧普洱元江接連外夷名擺夷一作百夷古西南夷古人也麗江鶴慶一帶有麼些古宗皆西

番人乃唐吐蕃部其雲南曲靖東川昭通楚雄皆獠獯大理等府亦有之
蓋古之蠻人種極繁衍當唐時已有五花蠻之名按獠獯土音呼人曰烏蠻此五種接
壤而居風俗語言卽不通故不可考至東北諸郡近黔省者亦復有苗民
居住

物變

予前紀飲食音樂之變矣然事物有古無而今有者大約西漢元及明末
爲多漢之蒲桃也苜蓿也西極之馬也祀天金人也元之綿布也火礮也
火酒也明末之眼鏡烟草及窺天測時諸器也漢初通西域元平西域諸
國明神宗朝利瑪竇由西洋入粵東蓋各國所產之物皆中夏所本無者
於是佛法卽來自漢唐有景教卽今回回清真教元有巴思巴之番僧教明末有

天主教蓋西域人多慧而好奇其互相牴牾亦勢也至疾病亦有古無而今有者如痘瘡始於漢骨蒸病始於隋末皆爲靈素所不載元之醫師丹溪東垣亦因時制方著爲大家去聖人遠飲食水火皆失其道嗜欲日開資稟逾薄而天札者多也

痘瘡始於漢末見痘科醫書骨蒸病始於隋末見巢元方傳

顏氏家訓

顏氏家訓文筆既古雅考核亦精切獨所論疥核二字未爲確當左氏曰齊侯疥遂疔杜註無解蓋二疾皆屬風濕感而爲疥內陷則爲疔矣余嘗患此它人亦有患之者不然一二日之瘡亦略有輕重古人又何必申言之乎

史記孝文帝紀

孝文帝二年十一月晦日有食之十二月望日又食徐廣謂史書不記月食然望無日食之理蓋旬有五日之內兩曜並蝕故下文帝自咎不德也徐氏徒致辯於漢書及天文志有無此文則其於天學亦已疎矣

試牘

日知錄載明鄉會試卷首行頂格寫第一場三字二行低一字寫四書二字三行寫題目故低二字小試首行寫四書二字二行卽寫題目故低一字按康熙年間所刊棘闈事宜其寫卷之式猶然今則展卷竟低二字寫題矣其更改當在雍正初年以前不惟是也雍正初年二三場試卷尙無橫線如廷試及武闈卷試蓋策論須議論明暢非若經義限以字數今粵滇省武場卷亦有橫線豈非展轉逾失其本意乎又鄉會試所刊硃卷首

行題上俱六圈初亦未解近觀康熙初年所刻者則上三圈較大殆主司房官各加三圈其文內亦有小單圈點今概渾作六圈又何能辨以上皆小節然今數十年卽求其故而不得矣

元朝姓氏

元史稱帝姓奇渥溫祕史載孛敦察爾自爲孛爾只止歹氏此亦如中國姓氏之別蓋各蒙古之類凡十數皆出自奇渥溫姓帝自爲孛爾只止歹氏以別之孛爾只止歹其先世之名也蒙古不諱名其來久矣今蒙古元裔皆博字爾濟只吉止特歹氏而姓確特確北音作平聲卽奇渥亦平聲二字合溫其餘音當日譯言之訛耳

元朝子姓

明興而元入沙漠中遭額森之亂

明史書
爲也先

既危而後繁衍今四十九部中

之巴林克西克騰以西之數大部及七喀爾喀之君長皆是也回部之長

亦有元諸王之後鄂羅斯之察漢罕亦是太祖從子之裔至東徼科爾沁

等部乃朵顏三衛之衆泰寧爲遼王孫其始祖乃太祖族兄別里古台廣

寧王朵顏督都皆宗室近枝特以其曾伏屬於明北部

明人呼小王
子爲北部

不以

爲同族且通婚媾耳不惟是也都門有薄氏淮上有保氏其譜牒皆可考

予至滇回教中保姓極多雖不可確考得母有從梁王以逆明命如西域

之淪入於回部者乎

朔漠部考

明史所載韃靼部小王子之爲察哈爾前辨之矣其在三邊總要則目爲

北部北部之黑石炭卽克西克騰五路乃烏魯特與巴林敖漢爲近族譜

達

舊作
俺答

乃歸化城土默特吉囊者濟農也譯爲郡王居河套者爲鄂爾多

斯西部乃喀爾沁其一族爲烏浪漢濟爾默氏蓋卽明初所謂兀良哈

改今

烏爾
哈達

者屬夷則三衛之衆今科爾沁十旂及四子部落諸大部是也因上

考之元初塔塔爾之遺民今尙存於鄂羅斯晉書鮮卑以境內山名爲號

今西楚故境亦有西楚山應卽其種之僅存者不獨西藏之爲土番回部

之爲回紇其班班可考也

瓦刺

明史所載之瓦刺卽今之厄魯特其始祖爲托歡太師

明史作
脫歡

而未詳其

意恭閱平定朔漢方略博碩圖漢之稱號則首冠以瓦赤刺喀爾喀汗其

初亦有此三字封今達額喇之蓋唐古特文美稱也明國人不察遂以此呼之一成而不改耳故中國人不可與談邊外之事中國之書生更不可與談邊外事也

蒙古族姓

蒙古最重族姓分爲二種骨曰白曰黑白尊而黑卑白主而黑奴也今之白骨者二姓曰博爾濟吉特帝裔曰烏浪漢濟爾默后及駙馬裔也自昔北國皆與一姓通婚姻拓跋氏之呼延耶律氏之舒穆魯舊律今改元初之鴻吉哩舊刺今改皆然予謂齊姜宋子之見於詩伯舅伯父之見於春秋自晉唐以下譜牒失傳貴顯者且不知其先世矣更何氏姓之論乎

猓羅

獮獮亦有黑白之殊重黑而輕白予細詢之黑者乃真種白則其祖皆漢人呼爲皮匠蓋被掠買入山子孫從其俗而易形者也

緬酋

緬酋有名無姓莽者彼言王也達拉者首也蓋言諸王之長也吳尙賢所進表文首言緬甸國王臣莽達拉是亦明人稱瓦刺之類其出自中國彝民所撰不問可知按緬甸自元時始見史傳受封進貢所謂達拉者亦達魯花赤之類也

安南

安南於明世陳黎莫三姓迭遭篡亂國初封黎爲王莫爲都統康熙戊午己未之間大兵平定滇南黎亦攻莫破之言其通叛蓋黎東而莫西莫在

雲南徼外自是黎獨據交趾矣其事載廣西通志初觀之似黎誣莫乾隆丁亥粵西小鎮安匪衆出交一案於莫保家中搜獲莫氏族譜冊內一行云先用康熙年號甲寅年以後用滇中年號然則莫實從叛黎之言爲不誣也

神怪事

論語云子不語怪力亂神春秋時尙無橫議聖人實見後世必有侈談此四者故以不語置之至秦漢唐宋百家之言其不涉乎此者蓋亦鮮矣予生平所聞神怪語最多有二事極確附記於左亦自知有悖於聖人之訓也

館前輩王端木楷將以夏月赴圓明園引見約友人何德新同行過何舍

何設餐而飽途次復遇雨卽感疾醫工療之不愈至九月服桂附參耆無算漸至精神昏眊四肢委頓惟束手待訣而已忽張目呼其家人輩曰吾生矣然從言則生不從則直死耳詢之不能言所以然但索蔥十斤作浴湯大西瓜兩圓白芨及人參湯各一盞而已家人不能決謀之其友張素邨紹渠張謂人必死從之以冀倖否則潔身而正命亦無不可也但身僵而不能浴以布醮湯而熨焉乃熨四肢則能舉及胸背則能坐家人益奇之卽進瓜兩手掬而食之未盡曰吾當吐卽吐紫黑血盈盥盤進白芨湯而止曰吾當汗汗後必昏厥則進參湯卽大汗凡所服之藥其臭味皆自汗出黃耆尤不可近鼻服參湯得眠調理數月而瘳蓋其昏眊中恍惚至一殿廷審視之則正陽門關帝廟也帝君坐於上曰汝不應死但爲庸醫

所誤然不可爲矣因跽祈言母老子幼而貧不可死狀帝君憫曰吾當療子因授是方且曰汗後則世閒醫人可以治之帝君之德豈不赫奕哉原其疾乃暑熱飲食之氣爲雨中寒濕所束縛服溫補劑乃莫揀蔥以解表瓜以清裏畜血去而汗而起也此前輩王方伯芥子所言也

其一則辛未年予肄業官學時理學務者內務郎中王柳溪常住其子鍾英亦與予同筆硯柳溪委審一事閱數月而不得情蓋圓明園深邃處夜失陳設玉器數事時和王爲總管奉旨求其人凡給事園亭之官役徧索而雜治之迄不得其要領也衆計有革退苑戶長明曾出入其地當訊拘獲於通州問之卽堅承及求其黨則妄指數人間無根據旋復易指且及其父父至哭詈之復易焉贓物亦不能得其自承則如故也柳溪與同事

諸君夜坐以鞠之至中夜忽仆地拽起則慟哭哭畢則呼殆市肆之鬻餅餌者也因言名小二父母尙在八年前方十有五歲正月初旬因鬻餅遇長明於柳浪莊求姦不從縛於樹旣姦而復勒其頸此案尙懸焉長明實殺人而非竊物承者我也復仆地明日以殺人事訊卽定讞竊玉事不復承矣柳溪至館舍日爲予輩言故得詳其備細方鬼之憑而訴也柳溪言汝靈鬼當知竊者亦妄指一二人鬼固不能知也竊玉者復閱數月始獲乃一禿髮善踰越屋垣者置於法

二者猶聞之於耳也已卯秋日予修功臣傳徵考典冊成官員傳二千九百餘篇其無可考凡二十七人蓋重名及馳贈官者然不敢忽議闕其疑附他傳以待考獨有貴州把總王奇生者祠冊注云雍正年則近而易徵

者也黔省所造册厚二寸許逐名點對每名已三點而卒不得時方九月天濃陰飄雨日將入窗牖漸昏因以筆乙其處持册以授供事供事以手承弱而墜册於案帙開則王奇生三字固儼然當吾目也審視之則在他人名下注中云巡哨者親見其同隊長王奇生被苗人用刀殺死列名處遺之故遍索而不得耳先儒云鬼神無形無聲又言有物此又何殊面語之乎予在桂林時劉太守松臣修葺學宮議芟去祠中無可考之鄉賢名宦予曰知其人不可爲鄉賢名宦去之可也若無可考安知其中無龔渤海馬少游乎因述此事以告劉乃止

鬼憑言者近復覩一事錢冲齋之任滇東也有妾曾生二子死於尋甸署中卽調任因厝於廟嗣是繼任者爲陳雪園龔西峰及予予卸事祝怡亭

以督糧署事蓋去錢妾死之日已七載祝署中已無一人知矣適錢冲齋卒其家人將護喪歸錢妾卽憑祝妾而言已有子尙在當以櫬同歸祝因告錢之家而偕遷焉此事怡亭自爲予言故書之以附於前三事後也

西齋偶得卷中

蒙古 博明 希哲

蒙古言特字之義

予前辨金遼國名及蒙古族姓嗣復得特字之義猶言衆也如左氏所稱諸姬諸任之類元時猶多諸王之稱亦可芴證近復有謂博爾濟吉特與博爾濟錦有別者蓋亦未知乎此也

文

小學之書莫古於說文然合宋徐氏所附益者僅九千三百五十三文蓋罣漏原多今所存玉篇乃孫氏上元本詳稽之凡二萬二千一百八十八文廣韻凡三萬六千一百九十四文六書略象形等四門凡二萬三千三

百二十八文是皆約略可考梅氏字彙依據前書收載三萬三千一百七十九字廖氏字通增大小字四百四十康熙字典刪削之而附補遺備考於後考孫氏所增唐韻收四萬二千三百八十三文宋祁等所輯集韻收五萬三千五百二十五文可云至備乃大廣益玉篇復有增益其爲險僻者顧不多與

騾字

馬之牝者曰騾曰草或作驂無騾字案騾字當作課言徵馬駒之課也

孫賓

世傳六壬金口訣一書題曰孫臏作當是孫賓賓漢武帝時人非戰國之武將孫子也善卜見齊諧記說部荒唐小道假託似未足全信然當日借

名亦必有所本也

錫伯

錫伯或稱史伯其語言近滿洲康熙年間自吉林蒙古地方遷入內地編佐領散居盛京各城按此當爲鮮卑遺民考顧寧人唐韻正鮮古音犀並載漢書匈奴傳黃金犀毗一犀毗帶鉤也亦曰鮮卑亦曰師比云云可爲確證

日月食

昏禮謂日月之食乃適見於天此義甚精蓋天道與人事相通天道有變人事應之人君與后覩而修省以人合天千古不易之道也疇人之術乃其迹耳豈可因推求之分毫無失遂謂爲常而非變乎至朱子當食不食

之說似仍襲唐宋人舊議自古斷無此事亦當時推步未精耳若真有之則失度大而爲災更厲矣且啓後世遇日食陰雨因之作賀之漸也

穀

傳曰五穀不分南人多不識北穀北人多不識南穀南穀者稻也稻之名多不過糯粳秫占四種糯天下皆同而遼地有旱田所植之糯粳粵人呼爲大米北地亦多旱粳秫納賦之米也占聞自宋時得自占城者其米與粳類而山田之水少者皆可植之秫占之類甚繁其大概無不相同此外則有菰米菰菱也又名彫胡嬰子粟藥之類米者也北地亦多有北穀菽爲諸豆之名尙無難分諸書所載最淆混者則梁黍稷秫四種其米之狀大略相同注書者率南人故北穀多不能分今細考之梁卽今之小米也

秠小米之糯者也稷名糜又名稌黍又名粟稷之糯者也其實止二種有
粳糯之分耳爾雅粢稷注曰江東人呼粟爲粢是注家已未辨其爲粳爲
糯又藁赤苗注曰今之赤梁芑白苗注曰今之白梁秬黑黍注詩曰維秬
維秠經文梁黍之分甚明注者不解疏愈支離矣周禮膳夫六穀注有黍
稷梁而無秠大宰九穀注有黍稷秠而無梁疾醫五穀注有黍稷而無秠
梁舍人六米注有黍稷梁而無秠曲禮則有黍稷梁有粢而無秠本草經
注則有黍稷梁而無梁是皆於此四者未能剖析博雅秠稷也稷卽糯字
稷穉穉稷稌也亦殊望漏鄭漁仲通志昆蟲草木略稻梁類謂稷苗穗似
蘆今人謂之稌關西謂之糜是已又謂梁之類多梁是秠粟可作粢食及
釀酒又云梁亦有粳者又云黍之糯者謂之秠一名黃糯不知黍秠二種

皆可作粢釀酒皆可謂之黃糲所辨者稷黍之苗皆似蘆而米較大秬粱之苗皆成穗而米小各自爲種迥不相同其米則皆有青殼白殼黃殼赤殼之異名目亦多正如稻之占秬之異名也南人不及悉知是以多誤此外又有所謂高糧者蜀黍也北人多植之而諸書皆不載

北穀之異者有曰粱穀亦名涼穀粱之精者也色白粒微精南穀之異者有西穀亦曰西國米來自海舶粒如粱色味俱如藕蕨之粉南穀之稭當與北穀之稗同類滇之燕麥蜀之油麥西北之青稞與遼之穞麥土名鈴亦同類而狀小異也

詩鳥獸草木之名

夫子以詩教小子曰多識於鳥獸草木之名蓋古人託物興懷卽物比擬

或賦其犧牲乘駕牧字之盛物產卉植之美非是則不能成篇皆天地自然之文章也今考三百七篇之內終篇而不及四者之名者國風一百六十內殷其雷小星江有汜綠衣日月終風式微泉水北門二子乘舟蠨蛸考槃君子陽陽緇衣遵大路狡童褰裳丰子衿著東方之日載驅猗嗟陟岵揚之水無衣秦無衣權輿月出素冠破斧三十一篇小雅七十四內彤弓庭燎雨無正何人斯谷風無將大車鼓鐘瞻彼洛矣漸漸之石九篇大雅三十內文王下武既醉假樂泂酌民勞板七篇魯頌則無一篇惟周頌三十一篇內我將思文臣工噫嘻振鷺豐年雖有客小毖載芟良耜商頌五篇內之元鳥殷武永言及之蓋頌揚之詞義取喬皇質實與風雅之體制不同也笙詩六篇雖亡其詞而白華華黍猶以名篇其言及四者之名

之詩共二百三十七篇所言之黃鳥鵲鳩雀燕雉鴈鳥鴻鶉鶴鳧鷖鷓鷹

鶴鴛鴦鳳凰鷺鷥元鳥鳥以上馬兔麟鼠羔羊虎狐狼豹豺象貉兕鹿羴羆

熊羆豕貓獸以上葛桃蕨茅蓬麥薺匏葷蕒草黍稷竹竿艾蒲麻荷勺藥

莠芻紵著稻瓜壺蒿瓠梁蔦女蘿藻芹草以上桃甘棠梅李桐榛栗梓漆桑

桑葚棘木瓜松柏檜檀柳榆椒楊棗梧木以上皆與今無異名其倉庚虬盧

兕達騂菡萏菽來牟稌蒹葭萋蕭葵久經詩文引用人所習知鴉鷓今謂

訓狐鵙名鵙鵙又曰淘河鴟伯勞鷦斯鴉名今白項鴉鵙卽雉桃蟲鷓鷃

小鳥也白鳥指鶴鷺而言蠻獐狔牡豕縱小豕獫狁驕皆田犬豕三歲豕

牂羊羊之壯者虓虎之怒者羸牝鹿犝黃牛黑脣騂犧騂剛皆赤色牛周

牲也白牡股牲也芣苢車前繁白蒿葭蘆苓甘草茨蒺藜唐兔絲葑蔓菁

柔荑茅之始生蟲貝母莖荻菴益母草杞柳屬生水旁樹如柳葉麤而白
菅葉似茅而滑澤莖有白粉稂莠草荏葦卽兼葭莫蓰莫苴麻子先種後
熟曰重後種先熟曰穆臺莎草香附子也萃蘋蕭藍染艸卽今之紅藍花
莪蘿蒿藿苗也甍小瓜莖烏頭荏菽大豆秬黑黍秠黑黍一稔二米糜赤
梁芑白梁楛似荆而赤木枝曰條幹曰枚舜木槿柞櫟條山楸粉白榆
駁紫榆樗今之臭椿木楛山樗檉河柳檠山桑樞刺榆柞櫟橡榭之類菑
木之立死者翳自死者灌叢生者柎行生者傳注本明無疑義至鳥類之
雕鳩舊說鵬類蓋誤泥鷹化爲鳩以雕爲深目狀也鄭漁仲謂爲鳧類多
在水邊尾有一白點故揚雄云白鷺合鄭序辨關關爲喙禰者之聲鄭說
良是晨風鷓也似鷓青黃色燕額句啄鄉風搖翅擊燕雀食之當是今之

擺胃之類鳩鳩粘鞠亦名戴勝或曰卽今之布穀離勃鳩卽今之斑鳩脊
令雍渠水鳥大如鷄雀背上青灰色雞腳長尾尖喙頷下黑如錢文杜陽
人謂之連錢一名錢母隼亦鷗之類古人於肉攪部辨之不詳且名不與
今同闕之桑扈竊脂也亦作鳳俗謂青雀今名蠟嘴嘴色黃如蠟也鷺一
名禿鷺似淘河爪如雞長頸赤目鳶如鷹北人呼爲鷗鷹南人呼爲老鷹
不能搏禽惟飛而伺蛙及腐肉城市多有之鷺按卽鷗蒼黑色隨波往來
又名海鷗鷗虞仁獸也瑞應圖曰白虎黑文今不得見若以爲天子掌虞
之官及漢東方朔所云騶牙皆近傳會鉅貉屬獸三歲曰特碩鼠卽鼠之
大者猯獼猴也貌猛獸今無其狀草類之苕生水上如萍而較大蔓隨風
引杜詩云水苕牽風翠帶長是也卷耳泉耳作蒼耳者非非似蒿莖羸葉

厚而長有毛苾苾者又名荆葵花正紅紫芄蘭草一名蘿摩蔓生斷之
有白汁龍與茶俱爲今之蓼按蓼有生於水中者地上者故異名耳其類
有青蓼紫蓼諸種一名蒨又作蒨又名蒨龍又作龍凡詩中茶字皆是也
今亦謂之爲辣茶用毒魚惟出其東門之茶乃茅華之輕白可愛者也此
當與國語如火如荼之茶同義鴟臬之茶傳曰萑苕可藉巢者按萑與茅
近苕亦華也蓋荻之白華也茹蘆可以染絳卽今之茜草蘭蘭也其莖葉
似澤蘭廣而長節高四五尺卽藥中之徐長卿蘇似括蓼葉盛而細卽今
之白蘇苦卽今之苦菜莫水菜似柳葉而厚長毛刺可爲羹蕘水鳥也葉
如專前草鶉小草雜色如緩蔓又名棘菴遠志苗也苳莖如釵股葉如竹
蔓生牛馬喜食之萊草名葉香可食藜菜別名今謂之灰藜蓬牛藜也今

謂之羊蹄菜又名藟高尺許方莖葉長而銳有穗穗間花縹紫色可淋爲
飲菑爾雅注大葉白花根如指可著熱灰中濕啖之者綠王芻今未詳特
特生之苗苕陵者也卽凌霄花初生依喬木歲久引之顛又曰女葳蔚牡
畝也三月始生七月始花如胡麻而紫赤八月爲角如小豆角銳而長茆
與苕菜相近葉大如手赤圓莖大如七柄葉可生食亦可鬻滑美卽張翰
所思之蓴菜也見周禮者音茅見詩者音柳按字書從苕者音茅從苕者
音柳然義殊無別茆又作柳木類之楚荆屬唐棣郁李也樾赤蘿也爾雅
曰樾蘿山梨也萋楚今羊桃也子如小棗亦如桃椅梓實桐皮扶蘇扶胥
小木也今不詳杻檝也葉似杏而尖白色皮正赤郭注似棣細葉鬱棣屬
蓋李屬之果也枸枳枸一作棋一名樹密一名木飭一名木珊瑚味甘能

解酒毒穀楮樹也棟鼠梓亦名苦楸當亦楸木之異種者梡生劔南山谷
或曰楨又名靈壽漢孔光年老賜靈壽杖卽此云至四詩內之言馬者最
詳以體言者五尺以上爲駒七尺以上爲駉肥壯曰駉以色言者驪黑色
鶉驪白雜毛白顛額有白毛後人謂之的類鐵黑色如鐵騏騏文也馬左
足白曰舁駉黃馬黑喙駉白馬黑鬣駉白駉駉馬白腹驪驪馬白跨皇
黃白又作驪驪駉倉白雜毛駉黃白雜毛騏青黑雜毛驪青驪麟今之連
錢駉赤身黑鬣雜黑身白鬣駉陰白雜毛又謂泥驪駉青驪駉形馬雜毛
卽赭白驪豪在胛而白又爾雅驪馬黃脊曰驪二目白曰魚似魚目也駉
赤黃蓋出車賦乘周人最重故能剖別如此計釋鳥之名三十有八獸之
名四十有五草之名九十有四木之名五十有五馬之名二十有七其易

識者略之難識者詳之古有今無者闕之如右亦足資學詩者之記誦也

爾雅蟲魚

爾雅釋蟲凡八十有六郭註未詳者六諸慮不凋傅姪蛭縹密肌與魚部
蠶醜同類者一螿蟻蛭同類者一蜃蜃螻蛄也縹與蜃同類蜚負版蟲蟻
衡蚰蜒蝮之類七皆蟬也蝓蛻蛻蜋也蝓三見與蝓蟻皆木中蠹也蟻似
天牛有白點今亦呼爲天牛蝓蛻與蛻蜋同類朝生暮死蝓綠色甲蟲大
如豆蠶食瓜葉黃甲蟲蝓蝓米中蟲不過與蝓皆蝓蜋也蝓蝓蝓子疾
藜一名蝓蛆郭注云似蝗而大腹長角能食蛇腦今無其種蝓今謂之蝓
蝓蝓蝓今促織阜螽之類有五今蝗及絡緯屬也蝓蝓蝓也蝓蝓蝓即蝓蝓
蝓與蝓即載毛蟲也蝓及蝓威瓮底蟲也蝓書中蠹魚蝓羅蠹蝓翰莎雞

也小蟲黑身赤頭強蜥蠊類蝮蛹蠶蛹蓋蠶欲化蛾先成蛹今繭內之似
蟲者也蜺小黑蟲赤頭蚍蜉之類四皆蟻也蝼蟻卵也次蠶之類三及蠹
蛸王蛭蜴皆蠶也土蠹木蠹與果蠹同種異產螟蛉本桑蟲果蠹取以
爲子也蟻糞土中蟲今名蟻糟國貉廣雅云土蛹蠶桑上蟲多足能屈伸
蚯蚓蠟大如指似蠶蠟小蟲也蠟繭也五種有食桑樗棘欒蕭之別也醜
類也罽奮捋蜚扇乃羣蟲強蠶蠅之類也螟蟻賊蝻皆食苗之蟲釋詩也
詩蟻作螿有足無足統釋蟲豸之名也

釋魚凡六十有七跌蚤之類四皆蛇虺也神龜之類七魁陸之類十有五
螺蚌屬也蚶贏蝸牛也能資龜鼈之三足者也蛭馬蝗也鼃鼃科斗蟾蜍
類也鮒大鰕也蝶螭四名皆守宮也其魚之與今無異名者鯉鱸鮠也鱣

鮓鮓鮓鮓皆鱈魚屬也鮓鮓鮓鮓皆與鮓同類而小異鮓今謂之重
 層鮓鮓本草作鮓魚經鮓鮓與鮓同類鮓鮓魚鮓當鮓海中之鮓魚也鮓
 鮓魚今之哲綠也鮓魚子也鮓魚之有力者也郭注未詳者鮓鮓鮓鮓
 鮓當為鮓鮓之類今粵人呼鮓為三鮓其文作鮓乙丙丁魚腸尾枕文之
 象形也

畝

算法家以方五尺為步積二百四十步為畝今山海關外以十八丈為一
 繩闊三丈為一畝積二百六十步六畝為一晌縱橫皆九十八丈積二千二百九十六步五晌為一漢子
三十畝積六千四百八十步百畝為頃積二萬一千六百步以平方開此國初圈旗
 地制也較之二百四十步為畝皆得十數之九官奉天者不可不知

五色

五色相宣之理以相反而相成如白之與黑朱之與綠黃之與藍乃天地閒自然之對待深則俱深淺則俱淺相雜而閒色生矣今試注目於白久之目光爲白所眩則轉目而成黑暈注朱則成綠暈注黃則成藍暈錯而愈彰黼黻文章之所由成此亦聖人近取於身之一端也

九減

前算旗地之數以九減旗制責兵之鞭數亦以九減以二十七爲六十三若司寇之責罪人仍十數遇熟審仍與漢人同議減

大斗小陌

顧寧人日知錄論古今大斗小陌甚詳今奉天之斗雖各市鎮不同大略

皆以倉斗二斗一二升爲一斗較古斗如今三倉升則七斗爲一斗矣可云大之至也其錢

則以十六文有半爲百與直隸同亦較古爲小之至也

斗酒

古之斗酒今三升也以三十寸六釐六毫爲升法以水方寸爲九錢三分計當爲八十五兩五錢四分五斤五兩五錢四分而古酒較今爲淡則斗酒亦未多也至李白之斗酒與汝陽之三斗與詩酌與大斗同飲器非量也

王制田數

王制田凡四海之內斷長補短方三千里爲田八十萬億一萬億畝孔氏疏義以一州方千里九州方三千里故有八十一萬億畝先儒以萬億爲衍非也陳氏集說曰當云八萬一千億畝如疏義亦承誤釋之今以算法

求之方一里者爲田九百畝方十里者爲田九萬畝方百里者爲田九百萬畝方千里者爲田九萬萬畝經文作九萬億者亦誤方三千者八十一萬萬畝陳說皆合究之以億計數不若用萬計數爲善蓋數學家有以十萬爲億十億爲兆者有以萬萬爲億者所謂大小二法具見內則注疏本易蒙混且旣以億計而不以兆計京計更未畫一也又云古者以周尺八尺爲步今以周尺六尺四寸爲步古者百畝當今東田百四十六畝三十步古者百里當今百二十一里六十步四尺二寸二分疏曰古者八寸爲尺以周尺八尺爲步則一步有六尺四寸今以周尺六尺四寸爲步則一步有五十二寸以此計之則百畝當今東田百五十二畝七十一步有餘百里當今百二十三里一百十五尺二十寸經文錯亂不可用也陳氏集

說以爲疏義所算亦錯當云古者八寸爲尺八尺爲步則一步有六尺四寸今以周尺六尺四寸爲步則一步有五尺一寸二分是今步比古步每步剩出一尺二寸八分以此計之則古者百畝當今東田百五十六畝二十五步一寸六分十分寸之四與此百四十六畝三十步不相應里亦倣此予以算法求之六尺四寸爲步百步爲六百四十尺自乘得四十九千六百尺爲周田百畝積又以五尺一寸二分爲步百步爲五百一十二尺自乘得二十六萬二千一百四十四尺爲東田百畝積減去東田百畝餘一十四萬七千四百五十六尺以二六二一四四爲畝法除之得五六二五畝是周田一百畝爲東田一百五十六畝二十五步而無奇零數與集說陳氏所定微不合其里數當云三百步爲古里六尺四寸爲步三百步

爲一萬九千二百尺今以五尺一寸二分爲步三百步爲一萬五千三百六十尺古百里當今百二十五里二十一步三尺二寸一分有奇也

馬今名

前旣據傳注爾雅釋名說文詮三百篇內之馬以色名者二十有五惟是諸書皆漢以前文字其名與今亦多不同因上稽國書下詢時名注之於左驪鐵皆今之黑馬鶉今之青馬騅青馬微白今之粉青騮青馬而黑白毛色分明今之沙青騏青馬微黑今之鐵青驛青馬有黑色圓毛今之菊花青騮毛色如灰今謂駱皮應作耗鼠色也騶紅白雜毛今之紅沙騮較紅馬而黑鬣尾全黑今之棗騮皇白馬微有黃色今之乾草黃駱灰白馬黑鬣尾今之海驪騏驎蓋指黑花而言駮今之黃白花馬白顛今之線臉驛今之

銀蹏魚今之玉眼以上皆合至駟乃黃身黑嘴駁紅白沙馬黑駿尾驪棗
驪馬白腹雒黑馬白鬣今亦無別名惟驕傳稱驪馬白駟清文鑑作棗驪
馬白腹驛諸書皆作赤黃色清文鑑作黃身黑鬣尾必自有說姑俟考

古畝

王制方一里者爲田九百畝注步百爲畝又古者以周尺八尺爲步疏古
以八寸爲尺若以今戶部量地尺爲準當六寸六分是古一夫受田百畝
當今二十九畝七分三釐也

周尺見居易錄
顧寧人說略同

五行生

五行生剋之理有正生正剋者火之生土水之剋火是也有借生以爲生
者金之生水是也金性肅清不能生化借土之培水卽由土而發其源有

借生以爲剋者木之剋土是也木氣條達不能自遂得水之滋土卽因水而損其質有得剋治而後能生能剋者木之生火金之剋木是也木之性燥濕不一有能生火者有不能生火者得金以磨琢之無不能生火矣金之體剛柔不一有能剋木者有不能剋木者得火以煨煉之無不可剋木矣有假所剋之氣以爲生者水性潤非假火氣則水之氣寒不能生木也有託所生之體以爲剋者火性炎非託木體則火之體虛不能剋金也土體厚重而性緩四行因之而生其生金也脅於火則金反銷融其剋水也制於木則水多泛濫且頑金氣重土氣有時受其凌厲積水體滯土體有時溷其泥淖第其力大而氣沈雖凌之溷之而卒能養金而滋水是不徒以生爲生而以剋爲生也五行之體用性情不同生剋之理各成其變如

是按之醫經星家無不脗合

說部辨誤

偶讀近人說部見其所辨證者不能無誤略爲訂正

池北偶談載高麗采參讚云三極五葉背陽向陰欲來求我椴樹相尋椴
音賈似桐按椴當作椴今參皆生椴樹下椴音段遼地多生土人率用以
制儿合樽字書二字分載甚明北地無椴木

又鴈門二字疏云岱山高峻鳥不可過惟有一闕門鴈東往向此闕中號
曰鴈門山按此岱字當作代蓋鴈門在山西代州若岱山則秦岳在山東
矣

言鯖山東以蕎麥作麪食曰河洛向不辨其何字唐明皇以鹿血煎酪賜

安祿山曰熱洛河似本此按明皇賜祿山者乃今之血酪以鷄鶩粉煮成如

糊俗名曰血糊

又名曰血膾見酉陽雜俎蓋唐人多嗜之若今河洛當作合漏見

稗官因屬劑麪用器漏下所成大抵飲食之名多出方言而皆有所本不可以意逆之也

又元之先國號蒙古蒙古國言銀也因女貞號曰金乃以銀號其國也按此亦意逆之失蒙古部落名其來已久較其世次當朱里真未以金號其國之前且各國之語言重輕不同音義大異豈得以聲偶相近卽漫爲是無本之論耶

又辨杭州本名虎林唐以避諱改爲武爲非引晉書地里志及顏師古注漢書地里志皆引武林爲據不知此正足證唐之避諱也按唐高祖紀皇

祖虎皇考晒故諱虎曰武又曰獸諱晒曰景溫大雅唐創業起居注有龍獸之氣其他石季龍以字稱杜詩龍武新軍無不諱者而唐人所修之晉書陳書隋書南北史亦無不書景子景寅者顏師古亦唐人也晉漢地里諸書敢不諱而易其文乎

天祿識餘謂左傳昭十年子皮謂子羽曰夏書云欲敗度縱敗禮此二句見今太甲又十七年太史曰在此月也故夏書曰辰不集於房云見今

允征子皮以前語爲夏書杜注皆以爲逸書殊可訝又云此兩節皆見今文尙書按允征太甲皆古文非今文也古文古尙書晉梅頤奏上預注左氏時此書並未行先儒正以注家指爲逸書者收拾無遺爲可疑則杜注不可議若以晉世可疑之書上議左氏不更屬大感也乎

又標目云十五事下疏云沈休文碑蓋同王子洛濱之歲實惟辟疆內侍之年按此當云沈休文齊故安陸昭王碑文漫云沈休文碑亦涉混

義山詩話

語云詩無達詁然有本事在者不爲箋釋何以得解頃見揚州程午橋所補朱長孺箋註其顯有事蹟者無論矣最可議者則碧城三首也因論之如左

碧城三首不唯朱竹垞之辨甚確末首直出武皇內傳卽作者亦恐人誤認而明言之必曲爲公主入道之說則所謂人閒不知者何事詩人何爲而鄭重言之乎今爲逐句箋之然後義山之意可見貴妃以女道士入宮故三首皆作仙家語第一首首聯以仙山比宮禁三句言選入四句言進

宮三聯星沈雨過蓋指武惠妃殂後而阿環乃專承恩倖末聯以趙家姊妹餽遺之物寄意言武惠若未殂猶得交相妬寵或不致佚樂而受禍詩人忠厚之旨也二首乃指入宮時事對影聞聲人言妃之美也玉池蓮葉竹垞謂妃以處子入宮蕭史者壽王洪厓指帝皆以仙人喻之也或曰洪厓謂祿山者非蓋唐人咏妃事多言其入宮怙寵未有斥及阿辇者紫鳳一聯驕縱已極鄂君悵望亦謂壽王焚香獨自眠卽薛王沈醉壽王醒之意有謂此言妃歿後帝思妃非是蓋三首始言妃之死也七夕相逢溯入宮之日簾幙至今垂人不見矣桂輪生魄喻月缺珊瑚無枝喻花殘神方駐景隱鴻都客事鳳紙相思卽長恨歌意唐人無不以秋風客擬南內人作者已顯言之更何必出己意以爲曲說哉

倉尺

會典斗方三百一十六寸斛方一千五百八十寸兩斛爲石方三千一百六十寸如爲升面底方三寸深三寸五分一釐爲斗面底方六寸五分深七寸四分七釐九毫爲斛面底方一尺深一尺五寸八分爲十斗斛面底方一尺四寸深一尺六寸一分二釐云是今之量倉者乘米之後應以三一六爲除若仍以二五爲除則其尺必較工部營造尺贏八分蓋舊法方尺爲四斗以今四斗積一千二百六十四寸開立方其邊線爲一尺八分一釐二毫二忽也按此非尺法乃一時權宜之用

讀洗冤錄

讀洗冤錄舊註云於自縊之尙在懸掛未解時卽於所懸身下暗爲記明

於方行解下時卽用鐵器或用大石鎮而壓之然後於所鎮四面深爲挖取將所鎮土中層層撥視或三五寸或尺許或二三尺於中定有雞骨及如各骨之物在內取而或棄或焚則可辟除將來不至有再縊之事此魄也人死魂爲陽氣生於天魄爲陰氣入於地魄之光寄於目光亦火也入土故亦成土石不獨人物亦有之而虎與猫目有光之獸畜爲尤著於其死處立時挖取卽得之今松脂所結形類挖出其形狀每不同者則土氣各異之故耳雷楔亦火入土而多又云雷震典中所質之銅錫鐵物無不各於其所各鎔爲一及檢衣物布帛珠璣絕無一損者惟屬金銀無不別而鎔之猶曰在外者爲雷火所致及再檢匣中所藏其所鋼之紙如故啓而視之則無不各分而鎔矣蓋雷爲陰火先燔金石耳天地人身陰陽之火

各六在天日火星火在地戛石火敲金火鑽燧火在人心君火陽也在天龍火雷火在地水中火油中火在人相火三焦火陰也陽火先蒸草木後燔金石陰火先燔金石後蒸草木陽火得水則熄陰火以火攻之則熄得水燄薰天矣夢溪筆談等書亦及之而發其理未暢故詳言之

史誤

明史天方國傳云相傳回回設教之祖曰馬哈麻者首於此地行教死卽葬焉下默德那國傳云其初國王謨罕慕德生而神靈盡臣服西域諸國諸國尊爲別譜拔爾猶云天使也以一卷書而志一人其名不同如此又曆志回回曆法云回回曆法西域默狄納國王馬哈麻所作則併國名字亦不同矣至藝文志雜史類楊慎滇載記一卷當作十卷五行類劉基三

命奇談滴天髓一卷當作二卷天文類鬼料竅一卷下註云不知撰人按鬼料竅卽天文步天歌也其全文已載入鄭漁仲通志不當入明藝文志以上皆承王鴻緒元本之誤也

六壬口訣

世有所謂六壬口訣者列六課曰大安留連速喜赤口小吉空亡三吉三凶相間以月日時加而成卦蓋以三奇偶相加三奇乾也正月初一日子時之類三

偶坤也二月初二日丑時之類互衍而成八卦之義也乾及震坎艮三陽卦爲吉坤

及兌離巽三陰卦爲凶其六課之義陽之初曰大安陽未盛而和平之象速喜則陽正盛而福洊臻矣小吉陽之微也留連滯晦不進之狀陽一變而爲陰赤口陰盛嚙陽爲大凶空亡吉變爲凶凶變爲吉陰衰陽將復也

莫謂小數爲無本

銅尺

邵楚帆氏以部頒銅尺式示予卽今工部營造尺也以市匠尺校之不爽
織毫康熙年間所頒黃金白銀方寸以定律度量衡之製者卽此尺也王
阮亭先生云孔東塘得漢建初銅尺以定古今尺予習其法卽以是尺求
之周尺一尺爲此尺七寸四分則此一尺爲古尺一尺八寸三分強漢末
尺一尺八釐強宋尺一尺一寸三分強今戶部量地尺八寸八分二釐強
顧寧人先生以貨布之廣爲古一寸乃明鈔尺六分有半蓋明戶部鈔尺
較今戶部量地尺微強也今而後可無疑於尺矣

予任滇西時明制軍委以盤察因議及戶部尺較工部尺贏八分蓋用舊

二五爲斗之法也後閱會典知三一六之法開方果符一尺八寸之數近虞山屈氏所刻數理精詳載有古今二尺式其古尺適爲此尺之八寸乃唐尺也按漁仲通志乾元重寶錢徑一寸以此尺度之乃八分正與唐尺脗合今尺較市匠之尺絀二分嚮疑市匠尺爲大強今乃知刻本之誤也

光陰

僧祇律云二十念爲一瞬二十瞬名一彈指二十彈指名一羅預二十羅預名一須臾一日一夜有三十須臾以今日法求之一須臾爲三刻三分一羅預爲二分二十四秒一彈指爲七秒十二微一瞬爲二十一微三十二纖一念爲一微一纖有奇也小餘三六統計一日夜爲四百八十萬念乃三萬一千一百四萬纖亦甚密矣

今日法日十二時時八刻刻十五分分六十秒微纖同計日九十六刻一
千四百四十分八萬六千四百秒五百一十八萬四千微三萬一千一百
四萬纖

西齋偶得卷中

西齋偶得卷下

蒙古 博明 希哲

艮震巽兌卦義

天地陰陽之體也水火陰陽之用也山澤水火之託體於地也

山乃火灼土而成其

理確不易 風雷陰陽之施用於天也雖予一得確有實理

學而章義

學而爲論語首章讀諸講義多有未慊蓋此章爲初學說法時習朋來不知不愠原非說樂君子之極詣言時習即可說得朋即可樂不求人知即可謂之君子其理始足不亦二字語氣亦足

梁惠王章義

孟子學論語者也承其道統擬其筆法卽首章二亦字其義亦有可言惠王蓋目擊衍代儀秦開口言利此亦字指若輩而言也孟子守先待後心契古聖前王此亦字承古人而言也

讀易

大象六十四脩己之事三十二治人之事三十二自彊不息乾果行育德

蒙飲食宴樂需作事謀始訟懿文德小畜儉德辟難不可榮以祿否遏惡

揚善順天休命大有嚮晦入宴息隨多識前言往行以畜其德大畜慎言

語節飲食頤獨立不懼遯世无悶大過常德行習教事坎繼明照于四方

離虛受人咸立不易方恒非禮勿履大壯自昭明德晉言有物而行有恒

家人同而異睽反身修德蹇懲忿窒欲損見善則遷有過則改益順德積

小以高大升致命遂志困正位凝命鼎恐懼脩身震思不出其位艮居賢

德善俗漸永終知敝歸妹朋友講習兌行過乎恭喪過乎哀用過乎儉小

過思患而豫防之既濟皆修己之事也厚德載物坤經綸屯容民畜眾師

建萬國親諸侯比辨上下定民志履財成天地之道輔相天地之宜以左

右民泰類族辨物同人寡多益寡稱物平施謙作樂崇德殷薦之上帝以

配祖考豫振民育德蠱教思无穷容保民无疆臨省方觀民設教觀明罰

勅法噬嗑明庶政無敢折獄賁厚下安宅剝至日閉關商旅不行后不省

方復茂對時育萬物无妄遠小人不惡而嚴遯蒞眾用晦而明明夷赦過

宥罪解施祿及下居德則忌夬施命誥四方姤除戎器戒不虞萃勞民勸

相井治曆明時革折獄致刑豐明慎用刑而不留獄旅申命行事巽享于

帝立廟

漢

制度數議德行

節

議獄緩死

中孚

慎辨物居方

未濟

皆治人之

事也盡性之學成德之事禮樂之大政刑之細罔不具備內聖外王聖人
之用易如此

八卦之義前既論之矣因考其象與名三奇純陽爲天天爲左旋大氣萬
物皆因所旋而成其旋至健故名曰乾乾健也三耦純陰爲地地爲旋中
靜體萬物皆承天所施而生其應至順故名曰坤坤順也陽氣得陰聚而
爲火太陽星精及人閒之火皆陽麗於陰故名曰離離麗也陰氣得陽融
而爲水太陰金水二緯及海水皆陰限於陽故命曰坎坎限也四維之卦
則離坎與天地交而成象以體言之震艮二卦火體也離與坤交者也離
火上騰爲陰所冒則激而爲雷其性震撼故名曰震震動也離火下限爲

陰所阻則灼而爲山其性堅止故名曰艮艮止也巽兌二卦水體坎與乾交者也陽氣暄於下坎水爲陽所乘土氣暖則泉動地則匯而爲澤潤萬物故名曰兌兌悅也潤之用也陽氣通於上坎水爲陽所感濕氣上浮則蕩而爲風撓萬物故名曰巽巽入也撓之用也陰靜而陽動陽施而陰受可以悟造物之神矣

若以形論則震乃離之上爻爲在天之陰所冒故離之九三變陰而爲雷巽乃坎之上爻爲在天之陽所感故坎之六三變陽而爲風是坎離之交於天也艮乃離之初爻爲在地之陰所阻故離之初九變陰而爲山兌乃坎之初爻爲在地之陽所暄故坎之初六變陽而爲澤是坎離之交於地也

八卦重而爲六十四卦自八純卦而外或以時成或以位成皆以天道配人事實以人事盡天道聖人法天之學也三百八十四爻或履安則思危或遇危則求安聖人趨吉之用也

大象六十四以人事而盡內聖外王之道小象三百八十四以天道而盡參伍錯綜之神所謂奇而法也大象之學平實精當小象之學變化精嚴程子以易爲說理之書故所言皆修齊治平之道大象之學也朱子以易爲卜筮之書故所言皆時位中正之精小象之學也

乾九二之文言曰閑邪存其誠坤六二之文言曰敬義立而德不孤主敬存誠實爲千古道學之宗觀此則知後史判儒林道學爲二傳之外後儒專務尊德性致良知者之非

師卦首重以律師中則吉申言弟子與尸小人亂邦誓誥之精義也家人王假有家有孚威如本之言有物而行有恒大學之實理也

目理

目睛體至圓瞳體亦至圓故其爲用也視近物則大視遠物則小蓋圓則外照之光亦如天體地球之有度數近則度狹遠則度廣所謂車轂形是也入目之物得其度分之多卽見爲大少卽見小物近則所得度分多遠則少漸遠漸渺至極微而有所不見矣今設以瞳中心作點分三十六度以黑睛輪徑三分周九分五秒有奇計之每度當二分半有奇引至輪徑一尺視五寸則每度當八分七釐二毫有奇更引至視遠一丈則每度一尺七寸四分二釐有奇以徑五寸之物當之去目五寸可當二度至一丈

則不抵十分度之一其大小之形不啻減二十倍使遠至數十百步不更

小乎然皆可以算術求之也此卽勾股測量之源

視輪之度線一爲股一爲弦度之廣狹爲勾成

四半比例泰西畫之線法亦由此出人生至十六七歲以後腎氣耗減其瞳內

之精氣不能綻足曰視近

如讀書作精巧藝事類

則目光爲近物所聚其圓體微尖

尖則本體小外照之度亦小於是視物形較大且逾遠逾大故視近物明

視遠物散漫而不明曰視遠則目光爲遠物所散其圓體微平平則本體

大外照之度亦大於是視物形較小且逾近逾小故視遠物明視近物迷

亂而不明率皆與年俱增更有生而目力不足者或由生稟肖父母亦有

因疾而致者

目鏡則因其不圓用透明之物製極圓凹凸之形映目使完其綻圓之體

也凹形聚物形爲小小則遠者適還其本體故不散漫以之視近物反迷亂矣凸形散物形爲大大則近者適還其本體故不迷亂以之視遠反散漫矣而皆有等階最凹者視最遠次凹者視次遠微凹者視微遠最凸者視最小次凸者視次小微凸者視微小因己之目力復以遠近大小爲程多儲審定其妙自見焉

目鏡卽陽燧也陽燧以玻璃爲圓珠承日光而取火其日光聚處卽在輪邊珠大則光大珠小則光小卽度數之義蓋通體爲極圓上半所收之光聚於下半之底而凝成火體過此復散其影上下東西互易其凸形之目鏡以規引之亦成圓形其映日光而聚而生火之尺寸卽其圓體徑之尺寸也凸之最者生火易凸之次者生火難微凸者不能生火乃其圓形大

而體薄不能聚光也若作徑一尺五寸之大玻璃珠即一尺五寸亦能生火

朝鮮詩人

朱竹垞明詩綜載朝鮮國人八十有二其爵里表德文集缺而未載及所載有舛誤者郵致鮮國代為檢核補之其檢而未獲者仍闕焉

鄭希良 字淳夫官校理有虛安集

曹庶 仁山人官參議

權擘 字正卿東安人有所聞堂集

尹子雲 字彥龍茂松人官左議政有樂聞軒集

李克堪 廣州人

申從濩 字次詔高靈人官參判有三魁堂集

成侃 字啓叔號備齊昌寧人官大提學有虛白堂集

成侃 字和仲昌寧人官修撰有真逸齋集

盧公弼 字希亮交河人官領中樞府事有菊逸齋集

李荇 有容齋集

尹仁鏡 字鏡之坡平人

金麟孫 字呈瑞慶州人官判書

尹殷輔 字商卿海平人

林百齡 字仁順號槐馬善山人官右議政

李潤慶 字重吉廣州人官判書

徐敬德 字可久唐城人贈官右議政有花潭集

朴淳

字和叔，忠州人。官領議政。有思菴集。

李珥

有栗谷集。

金瞻

字子瞻，號荷堂。安東人。有東岡集。

高敬命

字而順，號露峯。長興人。官參議。有苔軒集。

許葑

字美叔，號荷谷。陽川人。官校理。

金尙憲

有滄陰集。

李廷龜

字聖徵，號月沙。官判書。其先世蓋關西李氏。入高麗者，原云號栗谷。栗谷李珥號也。蓋誤。

崔壽城

字可嶺，號猿亭。江陵人。處士。城當作城。

林悌

字子順，處士。有白湖集。

趙希逸

字怡叔，號竹陰。林川人。官參判。

金塗 字冠玉 號北渚

申欽 字敬叔 號象利 平山人 官領議政

權鞞 字汝章 號石洲 安東人 贈官 持平 有石洲集

趙昱 字景陽 號龍門 平壤人 官主簿 有葆真集

柳永吉 字德純 號月篷 全州人 官參判

魚無逸 字潛夫 號浪仙 咸從人

李嶸 字仲高 完山人 官翰林

金宗直 字季盞 善山人 官判書 死節之臣也 有佔畢齋集

李承召 字允甫 號三灘 陽城人 官判書

鄭楮 字君敬 號古玉 溫陽人 官司評

李直 字汝固號澤堂德水人官判書

李達 著有菘谷集詩而不詳其名蓋誤

朴瀾 字仲因號芬西播南人官錦陽尉

姜克誠 字伯實號醉竹晉州人官舍人

鄭之升 字子慎溫陽人處士有叢桂堂集

姜渾 字士浩晉州人官判中樞府事有木溪子集

金淨 字元冲號冲菴慶州人官判書

鄭知常 西京人官知制誥

李仁老 字眉叟仁州人官右諫議大夫有雙明齋集

李安納 字子敏德水人官判書原未載名

梅月堂詩集

乃金時習作時習少穎異後避世隱于釋儒之間

月山大君婷

坡隋王子康靖王娶弟朝鮮制王兄弟封君同母者封大君非女子也詩話誤

以上共補四十八人

佛書文字

阮亭居易錄云董斯張字遐周湖州人號博雅所著吹景集一條云佛典

中本師二字見史記樂毅傳祖師見漢書丁姬傳居士見禮記及韓非子

魏志管寧傳侍者見國語及漢書眷屬見史記樊噲傳

本作陸注音眷

長老見漢

書宰官見郭象莊子注某甲見周禮鄭元注及應劭漢官儀布施見國語

供養見稽中散集煩惱見河上公老子注幢字見方言西京東都二賦薊

字見釋名右援據可謂詳博當是內典偶合耶抑襲取耶云云蓋佛書本

皆梵文其中國語皆譯者援據經史文以釋之不唯非偶合亦非襲取按史記樂毅傳贊樂閒學黃帝老子其本師號曰河上丈人是道家稱號漢書丁姬傳定陶丁姬哀帝母也易祖師丁將軍之元孫師古曰始祖也儒林傳丁寬易家之始師是儒稱號三國志管寧傳附見胡昭云民孫狼等自相約誓胡居士賢者也卽處士之名其眷屬侍者長老宰官供養煩惱皆古人常言長老則見史記五帝紀贊布施當係用莊子列禦寇篇施于人而不忘非天布也之義爲近幢字說文已載唯薊字文約也佛家詩曰偈文曰薊乃譯者借用或梵書文字本名音與相近故牽合之耳

三輔黃圖

三輔黃圖云漢舊儀曰長安城中經緯合長三十二里十八步地九百七

十二頃古人以三百步爲里三十二里爲九千六百步以九千六百十八步自乘之乃九千二百五十萬五千九百二十四步古人以百步爲畝爲九千二百五十頃有奇若依九百七十二頃化畝開方則經緯各長十里有奇矣卽以二百四十步爲畝法除之得三八五零亦更不合當是傳寫之誤自來未及察也

若以今尺法

漢一尺當今量地尺八寸一釐二毫

里法

三百六十步爲里

求之經緯各長二十一里

二百四十五步有奇今地二千四百七十四頃二十三畝一百五十九步

有奇也

二百四十步爲畝

古今尺

孔東塘周尺說蓋多本之耶瑛郎瑛則本之隋書因取而求之各以今尺

爲準詳載以備考

周尺

漢志王莽時劉歆銅斛尺

後漢建武銅尺

晉泰始十年荀勗律尺爲晉前尺

祖沖之所傳銅尺

俱當今尺七寸四分

晉田父玉尺

梁法尺

俱當今七寸四分五釐一毫八絲

梁表尺

當今尺七寸五分六釐三毫五絲四忽

漢官尺

當今尺七寸六分七釐三毫八絲

晉始平古銅尺

魏尺

俱當今尺七寸七分四釐七毫八絲

晉後尺

當今尺七寸八分五釐八毫八絲

後魏前尺

當今尺八寸九分三釐一毫八絲

中尺

當今尺八寸九分六釐八毫八絲

後尺

當今尺九寸四分七釐九毫四絲

東魏後尺

後周玉尺

俱當今尺一尺一寸一分五釐九毫二絲

蔡邕銅籥尺

當今尺八寸五分六釐九毫二絲

宋尺

錢樂之渾天儀尺

後周鐵尺

俱當今尺八寸二分七釐二毫六絲

開皇萬寶常水尺

當今尺八寸七分七釐六毫四絲

雜尺

當今尺七寸七分七釐

梁朝俗間尺

當今尺七寸九分二釐五毫四絲

以上隋書

周王朴尺

當今尺七寸五分四釐八毫

宋宋璟表尺

當今尺七寸六分六釐四毫

胡瑗樂黍尺

當今尺七寸九分一釐八毫

司馬光布帛尺

當今尺九寸九分九釐

以上郎瑛

古尺

當今尺五寸四分四釐

漢末尺

開元尺

俱當今尺九寸二分五釐

宋浙尺

當今尺八寸八分

今裁尺

當今尺一尺一寸

以潤省尺度之略合京師尺則較弱三分

今量地官尺

當今尺一尺一寸二分一釐二毫

今河北大布尺

當今尺一尺五寸七分一釐

宋省尺明官尺

與司馬布帛尺同

以上孔東塘

明鈔尺

當今尺一尺一寸五分六釐強

以上家禮

案顧寧人日知錄貨布長二寸五分廣一寸首長八分有奇廣八分其圖

好徑二分半足枝長八分閒廣二分所謂長二寸五分者今鈔尺之一寸

六分有奇廣一寸者今之六分有半八分者今之五分王莽時尺與周尺同依今法求之則與今量地尺近乃孔東塘云明部定官尺皆依家禮布帛尺凡田畝布帛營造所用悉同雖南北稍有參差然必以部定官尺爲準是則廣一寸者當云七分四釐而不可云六分有半矣明史云鈔高一尺家禮既載有鈔尺度數且云鈔尺者長準大明通行寶鈔今裁縫尺近之其非官尺明甚蓋本朝有戶部工部二尺工部營造尺卽此尺乃天下所通行者戶部較長乃量地所用其明鈔尺殆卽明之戶部尺東塘或未之考耳右今古尺凡三十六皆依今部頒銅尺爲準詳爲注之朱子所謂得一書爲據者此也

漢二千石

日知錄云漢書汲黯傳如淳曰真二千石如字月得米百五十斛歲凡得千八百石二千石月得百二十斛歲凡得一千四百四十石是漢一石卽一斛方尺爲今尺七寸四分斛積爲今尺四百五寸二百二十四分以今三一六爲石音担法漢一斛抵米一斗二升八合五勺五撮真二千石乃今二百三十一石三斗九升二千石乃今一百八十五石一斗一升二合也

不花

相傳琵琶記傳奇乃永嘉高則誠爲王四而作牛相則指不花丞相世多以爲不花居牛渚沈德符顧曲雜言則謂元人語以牛馬爲不花今按蒙古語牡牛曰布哈是明指牛言與馬何涉至牛渚尤屬附會

坤輿圖說

利末亞洲厄日多國孟斐府尖形高臺多祿茂王所建地基矩方每方一里周圍四里臺高二百五十級每級寬二丈八尺五寸高二尺五寸頂上寬容五十人造工者每日三十六萬人今以每方一里爲一百八十丈臺中心折半九百步爲四百五十丈以每級二丈八尺五寸迭減至一百五十級則止矣若頂容五十人每人站地方一尺則臺頂方七尺有餘加以二百五十級每級寬二丈八尺五寸至二百五十級每方爲一千四百二十五丈七尺以里法除之每方當爲三里九分有餘四面可云十五里八分有餘也好爲奇論以至可嗤往往如此

猶憶予在滇東同藩伯有事於新興州時山腳積潦沒田使牧往勘歸

報曰長二十里闊四五丈二三十丈不等藩伯曰約田幾何應曰數千頃矣予笑曰長二十里是每闊五尺則爲三十畝通以四十丈計之是爲八十步亦止二千四百畝乃二十四頃也何多之云牧爽然衆皆哂焉亦此類也

查浦輯聞

偶閱海寧查德尹查浦輯聞有舛誤者附正於左

所云曆家大抵以漏刻長至六十短至四十而極前輩言惟正統己巳晝刻三十九夜刻六十一以爲陰過遂有土木之變然授時曆長極於六十二刻短極於三十八刻或爲驗於燕地偏北故然如外國之蒸羊胛未熟而天明也按授時以一日爲百刻今法以一日爲九十六刻所謂四十刻

者今之三十八刻六分六十刻者今之五十七刻九分三十九刻者今之三十七刻八分六十一刻者今之五十八刻七分三十八刻者今之三十六刻七分六十二刻者今之五十九刻八分也今以北極出度定晝夜永短京師北極出地三十九度五十五分冬至晝三十六刻十分與所云三十八刻者相近而可云陰過乎大抵明人於天文皆非實測故其說多不確若附會占驗則更謬矣

又云鱗魚不過鴨闌驛上饒鄭以偉詩出似游魚過鴨闌鴨闌在江西豐城縣界稍上卽十八灘矣按豐城縣在臨江府東北十八灘在萬安縣南自臨江府至萬安縣約九百里何得云稍上耶

又云天左旋故日月西行地右旋故江海東注天乃大氣自左而右日月

皆大氣中物故隨而西行所謂處其中者順之也地爲至靜之體本未有旋江河注於海乃其就下之性中國地東南濱海故水多東流耳若雲南水皆南流鄂羅斯國近北海處水皆北流何可以理附會乎

又載松江張宸長平公主誅蓋取原文而略刪之氣亦艱澁乃於順治二年上書今皇帝句遺書字乘鷓扇引乘訛東猶屬筆誤至重雲畢陌何心金榜之門晦重雲於畢陌乃唐李百藥太穆后冊文誅蓋言公主遭父母之喪無心於榮華乃抄作重雲筆墨不知竟作何解甚矣著書之難也

又山行乘櫳一音橋一音與一音獨註以鑊錐半寸施履下以便登山卽今履也櫳當作權止有拘玉切一音按禹乘四載山行者書傳作櫳注曰說文作櫳尸子云澤行乘藜藜音子絕反櫳力追反史記作櫳徐音邱遙

反漢書作榻九足反今考史記夏本紀山行乘橦不作橦字書亦無橦字以鐵爲錐施之履下上山無跌蹉卽今之腳齒與屨何涉至史記河渠書作橋註以爲直轅車者尤屬非是同一物而書異其名亦非有多音也屨从彳不作屨亦筆誤是祇據監本書傳而承其誤也

又集內輯周櫟園閩小紀凡三十二則蓋取本文而略加刪削者其中誤者凡五一魚魷蘭色白而莖高媚弱如籐絲力不承花名魚魷蘭按原文魚魷蘭以色白而莖高取重於吳越人皆見之魚魷嬌則莖質最弱力不承花竟以籐絲名莖是所紀乃魚魷嬌非魚魷蘭也一荔園及龍眼園吳越賈人春時卽入賞估之越人曰斷曰判閩人曰樸本文吳越人曰斷無判字一莆田黃氏自明開科一姓解元凡十一人永樂戊子黃壽生正統

甲子黃譽天順壬午黃初成戊子黃文琳甲午黃乾亨宏治十七年黃如金正德庚午黃廷宣嘉靖癸卯黃繼周己酉黃大觀壬子黃星耀乙卯黃懋冲按原書皆書紀年而係以干支宏治十七年下空二字蓋刻工所遺予爲補甲子二字今前後皆書干支十七年獨書紀年于文律亦草率又江皜臣善刻玉章世皆沙碾彼獨用刀云物堅者易取勢皜臣死林公兆熊亦能按原書皜臣善刻玉下節林兆熊止稱善刻石今作一節曰亦能涉混三蘇祠堂聯下句乃千古文章四大家蓋古人最重韓柳歐蘇改爲八不古八大家始于明之茅鹿門也

斯螽莎鷄蟋蟀

前卷釋爾雅蟲魚略及螽斯之屬而未詳今觀虞虹升說部辨矣第非今

之名凡蟲類多隨地脈小異故名多不同以南人而考北蟲是亦南人而言北穀矣幽北地今以京師之名注之斯螽卽螽斯蝗蟲也小而善跳者名螞蚱長而青長角長股以股鳴者爲叫螞蚱又大腹者名鹽駒大約皆生在五月前後莎鷄燕人呼爲聒聒有大小之別以小壺盧乘之置之懷袖閒暖則鳴不已形類螽而自爲一種蟋蟀卽促織鬪蟲也一名蒼爾雅之注未晰宜朱子南人以爲一物也

佛國

法苑珠林載智度論云晝夜六分有三十時春秋分時晝夜各十五時餘時增減五月晝時有十八夜有十二十一月夜時有十八晝有十二以今晝夜九十六刻三十分每時當三刻三十分若極長十八時爲五十七刻

十六分極短十二時爲三十八刻六分其地北極出地乃三十四度三十四分三十秒直今河南省之南陝西之北也按新唐書地志自羊首薛城西至永昌故郡渡怒江入驃國西北渡迦羅河又西南至中天竺國東境是中天竺國原本缺五字其南北緯度乃北極出地二十六度長不過五十三刻零短不過四十二刻零所謂十八時十二時者正洛陽晷刻爲北朝及唐之京都故譯者據所居之地以言而不察也

外國紀年

池北偶談載俄羅斯國以順治十七年稱一千一百六十三年案西洋稱今乾隆五十三年戊申爲一千七百八十八年漢哀帝庚申年乃其國之第一年予嘗詢之會同館肄業之俄羅斯官生則云今歲戊申爲一千七

百八十八年蓋彼國久奉西洋教法故紀年與西洋同書所記當有誤若
回回以隋開皇十九年己未爲阿爾必年至今歲戊申乃一千一百八十
九年蓋皆各記其開國立教之始不無侈張之意非若中國之建元也

如書

則至今戊申歲當爲
一千二百九十一年

隙積

筆談云隙積者謂積之有隙如累基層壇及酒家積罌之類雖倍覆斗四
面皆殺緣有刻缺及虛隙之處用芻童法求之常失於數少予思而得之
用芻童法爲上行下行別列下廣以上廣減之餘者以高乘之六而一併
入上行此四字當在六而一之上予案此卽今之四角堆梁也其法以頂層邊倍之與
底邊相加以頂邊乘之又以底邊倍之與頂邊相加以底邊乘之合二乘

出之數以高乘之爲總數此即筭章本法更以頂邊減底邊所餘以高乘之併入前總數以六除之即得本書列一法其中訛舛甚多蓋校讐甚難校算書尤難以數目字易差非逐字算之雖明眼人不能辨也予爲依法正之今堆垛法凡半堆皆先求得尖堆全積然後將上截之小尖堆積減去殊不若此之直截而密合也算書不載此法故詳錄之芻童法見九章經商功章今謂之上下不等方體

附較正法

假令積罌最上行縱廣各二罌最下行各十二罌行行相次先以上行二相次率至十二改一行也以芻童法求之倍上行長得四併入下長得十六以上廣乘之得二改三十二又倍下長得十六二字改四

三 併入上長得四 改二 十六以下廣乘之得三百一十二併二句倍得
三百四十四以高乘之得二 改三 千七百八十四重列下廣十二以上
廣減之餘十以高乘之得一百一十併入上行得三千八百九十四六
而一得六百四十九此爲罌數也

案精蘊上下不等方體第二法卽此芻童法也凡散物如土如米數皆
脗合者以每層皆作倚斜之勢順而平下故其數與第一法上下邊各
自乘復以上下邊互乘合而以高乘之三歸所得者同也若堆垛則以
方物疊成有刻缺虛隙卽有方體稜角其積自較斜順者爲多若僅以
芻童法乘之故常失於少此法以上廣減下廣以高乘之併入上行者
蓋以每層邊乃每塊之半其斜順之勢則爲半之半合四面爲一整塊

因首末位無可加故以首位減底位以高乘之得長方面積爲所少之數六倍加入除之而合密率也法亦巧矣

橘栗羊

明吳郡皇甫庸近峯聞略云羊之毒在駁名橘栗羊者爲甚案今北省人呼山羊爲駒驢此皆承殺羸羊之誤也宋蘇頌圖經本草曰殺羊毛長尺餘亦謂之殺羸羊北人引大羊以此爲美首此正今之山羊也殺音古羊生西北邊外秦音駒與橘相近耳然橘栗二字頗雅可入詩詞其駁字偏檢諸書未得其解當係舛誤

騾

本草李時珍曰騾類有五牡驢交馬而生者騾也牡馬交驢而生者爲騾

騃牡驢交牛而生者爲駝騃牡牛交驢而生者爲騃驢牡牛交馬而生者爲駝驢其言可謂詳明第騃乃驢父馬母見說文駝騃本作駝騃字書無駝字乃驢父牛母見玉篇其駝騃漢書師古以爲俊馬說文以爲馬父騃子駝驢古今注騃爲牝馬爲牡生駝驢牝騃不能生子二語非騃驢當作騃騃集韻以爲騃屬本草言皆是今騃正有此五種而未考之於古書遽以名之則略近武斷矣

泰西火法

昔人謂有溫泉而無寒火不知凡陽火體熱陰火體寒可見者如雷如螢如朽木皆寒不獨蕭邱之焰也今復於泰西之火法見之其製以方架運玻璃轉輪輪不拘大小所見者輪徑一尺一寸有奇厚一分以銅爲管徑

一寸五分而歧其末徑一寸其形如樹枝之朽杈空其中而閤其外其二歧之端銅體凹如小酒蓋兩端之相去爲輪之半徑以玻璃筒支焉其高下亦與輪之半徑準其端末去輪一分輪左旋而管內之火生矣用法以玻璃瓶中貯碎銀絲片而以銅珠塞其口轉輪時以銅珠與火管相接則火氣入瓶令人一手持小銅索一手持金絲縲以瓶口對小銅索相吸則人之兩手皆動而力甚猛若以人指與火管相近管內爆出火星有白光有聲或令人立玻璃物上而一手持小銅索以索彼端繞火管上他人以指與人之肌膚相近亦爆出火星輪旋則火星立生輪定則火星立熄是以奇也予爲之求其理蓋輪轉一天之左旋也動而生陽陰火少陽之火也陰火先熱金石故銅管受左旋之動氣無俟摩蕩而陰火卽生此

造物之大用也其氣盈乎管內以人氣感之則爆而出有聲有光擊物有力而不熱豈非雷乎因悟雷乃陰火爲濕氣所裹必有濕熱之氣感而引之而後擊理固昭然至陰火之氣能立貫人之肌膚金木土皆莫能禦之惟不能透玻璃性與物中之強水相近由是觀之強水亦陰火之精也易曰近取諸身遠取諸物西來諸法多肖能于兩大燒酒及蒸露之法風雨之理也水法瀑突泉之理也輪鐘時表天體之行也寒暑陰晴垂線諸表固非本太虛之妙此則體法天而用成雷矣更屬奇創友人詢其理爰剖論之

半翅鐵腳沙雞

偶讀居易錄論三者涉混夫三者之爲三物市人皆知之本無可辨第經

名人載筆轉滋後人疑惑因譯清文鑑小註於左

半翅兒似野雞身小尾短又有紅嘴半翅竹半翅凡三種沙雞似半翅腿如兔冬令羣飛飛時其聲甚大鐵腳似麻雀首有藍色尾兩邊色白春令至云云蓋二者之辨莫詳于此書也

西齋偶得卷下

西齋偶得卷下

一一四

鳳城瑣錄

蒙古 博 明 希哲

鳳凰城僻在東南邊門在鳳凰城東南其地形山水卽瀋城人多不之知況都中乎官其地者率無筆載居人亦鮮讀書好事者軼事恐久而胥湮也予於強圉作噩之春仲抵任卽詢訪故蹟惜無知之者求十一於千百浸錄成帙半皆瑣細用備考核朝鮮貢員亦時相過訪並問其國中典故亦間有所得集其語附焉其大政令邊裔微官固不能知且有所諱避而戒不言也時爲歲之仲秋朔日

鳳凰城邊柵在盛京城巽隅南一度六十分東一度自盛京一十里至渾河堡十里白塔鋪八里火石橋二里斬將堡五里鮑家窪子五里沙河

鋪十里長興店五里板橋鋪五里十里河入遼陽州界五里五里臺五里山藥鋪五里烟臺五里萬寶橋五里爛泥鋪五里三道壩五里張家台五里接官亭十里迎水寺十里遼陽州城三里額房十五里高里葱十二里望寶臺八里大石門嶺七里小石門嶺五里柳河子七里通官站八里馬蹄嶺五里浪子山五里二道河十里貨浪溝十里牛頭崖十里樣子嶺十里塔灣五里金家嘴子五里大高嶺二十里崔家店三里底塔十里連山關五里劉家嶺五里高家嶺五里分水嶺入鳳凰城城守尉管界十五里草河口十里和尚庄子十五里通遠堡十里二道房身十五里林家臺十里金家河五里劉家河十里雪裡站二十里四臺子十里二臺子十里鳳凰城三里山嘴子五里舊邊十四里長嶺子八

里邊門總四百五十八里其驛駟者八十里河迎水寺浪子山甜水站

予仲春蒞任值大雨春冰乍泮行殊艱載紀行中

邊門在鳳凰城東南三十里鳳凰山之麓植木柵爲繚垣屋三椽中爲門

施管鑰焉邊門章京司之是爲通朝鮮之孔道康熙二十八年初設領

催一名兵九名雍正五年添領催一名兵十九名乾隆六年添兵二十

名十一年於兵額內改領催二名不設蓋丁

權使國初不可考康熙三十九年七月初九日戶部題據盛京戶部侍郎

海帕題稱盛京各稅俱交城守尉管取此亦交鳳凰城城守尉並先派

京員試收欵依行

雍正五年十月十七日奉上諭鳳凰城中江稅著盛京五部堂官於五部

司員內揀選奏聞派出管理一年更換欽此遂於是年揀選具題旋經

戶部議令嗣後俱送部引見稅額初定二千兩

見康熙三十八年
侍郎海帕疏題

康熙四十一年經自京揀派員外郎鄧德試收增至四千兩

雍正七年郎中伊爾們增火耗八百兩

乾隆九年三月侍郎雙喜因每歲闕額奏請派京官試收

乾隆十一年八月奉旨派出試收之內務府佐領恩特二年期滿具報經

戶部酌中議定以三千二百九十四兩作爲定額以歲春冬之季徵之

蓋朝鮮賀正且使以三月出邊領時憲書員役以十二月初旬出邊也

雍正十一年十二月戶部議定飯銀領冊檔十六兩季報各十六兩考核

三十二兩

國家嘉惠遠人凡鮮人之物毫無收取所抽乃邊門商民之互市者馬市之兵丁台站門柵人等所易牛馬農器亦納稅焉其有非時之謝恩稱慶諸典禮往來者則別爲造報

馬市設於中江歲春秋仲月望後朝鮮員役以牛貨濟陳於江干駐防兵丁臺駟夫以布七千五百十四段易牛二百鹽二百九十九包海菜萬五千八百觔海參二千二百觔大小紙十萬八千張綿麻布四百九十段鐵犁二百具以京畿平壤黃海三道商各一人承辦義州知府率員役領之所具糗餌菹魚稱之曰宴其官商曰別將

權使無衙署僦民廬以居無胥役惟城尉撥有兵丁三人供使令歲支公用銀二百兩葺屋柴門終日靜坐是以家藩城者率以權事小畢卽促

裝歸歲數往返焉

其京員試收者給費
用銀四百兩旋停

其貢物自邊門城尉僱車至瀋

將軍衙門派僱員車解禮部交納攜帶之貨物則攬頭代爲僱車運京

鳳凰城邊柵北自石人子與驪陽接界南至海濱五百六十里有奇出柵

至與朝鮮分界之中江北遠而南近其地皆棄同甌脫者蓋恐邊民擾

害屬國乃朝廷柔遠之仁設官置汛立法綦嚴

邊外亦產參近邊之旂民及登萊流寓每私往覓之然生者甚少且不如

驪陽以北者之堅碩也故察邊外之私參非鳳凰城之要政云

奉天南濱大海金復蓋

奉天有金州
復州蓋州

與登萊對岸故各屬皆爲山東人所

據鳳凰城乃極邊而山之陬水之涯草屋數間荒用數畝問之無非齊

人所葺所墾者齊人性貪而狠遼人性愚而戇不爲愚弄卽成囂訟予

在藩時與司農署郎會鞠嘗觀廣志繹謂滇省皆爲豫章人所佔吾於遼之有山東人也亦云

邊門地多沙鹼生植殊薄所種惟黍豆數種而已麥閒有之稻則絕不生歲半仰給遼陽之粟大約喜旱而惡澇其惡春澇爲尤甚四節之序雨暘少愆卽告歉焉其勢又與藩城不同所居旗民自耕牧外惟事捕獵故善鳥磧者多雖兵丁皆疎於騎射以邊山多林莽不可以馳逐且三時皆在田而練習之日少也

疾病無醫人雖亦知服藥而無從得有攜至者不問溫涼補瀉而餌之矣往往致斃非然則委之於巫巫者備極作態以索謝焉余館之右有延致之者終夜喧呶撮弄病者欣欣俯而待命殊不耐觀

鳳凰山綿亘二十餘里山勢嶮嶭遙望峯巒直立自東北徑入約行石級

五里夾途皆水石有樹春白花微馨類玉蘭土人卽呼爲玉蘭是爲道

遙寺土人呼爲寺正殿三楹左右廊房各三楹出寺自右而上徑頗陁

行二里至藥王廟殿三楹右廂三楹爲延客之所前房三楹廟祝居焉

越右廂陟小石崗結草爲團廬祀碧巖元君呼爲孃孃頂由團廬後尋

徑穿石洞有小殿一楹祀大士爲觀音閣歲四月下旬八日賽社男婦

叢集焉由藥王廟南行二里許越一山崗崗上有隆恩眞君像無殿宇

石像兩施下崗則朝陽寺也寺殿三楹東廊三楹爲客堂堂東窗外有

茆亭一亭前鉅石上鐫五龍潭三字西廊三楹爲庖湑之所有數故碑

皆剝落聞昔有審視之者爲明人立云逍遙寺南有徑通舊邊門

邊門小山一爲鳳凰山之支北平行南頗峭下臨邊柵多橡櫟秋深紅紫
萬狀帶水遶其前白雲丹葉不減徐熙圖畫山南有關帝廟九聖祠龍
王殿爲邊眾報賽之所

邊門一小河源發自西溝山中至邊不過五六里北受鳳凰山南麓之水
西北受山內水夏秋積霖卽暴漲入室侵田村人皆預爲防之然以源
之近不轉晷卽歸壑也

邊外皆萬山北界靉陽南抵海東鄰鮮境連崗接嶺材木之所出麋鹿之
所遊也但久無人居其故跡多不可考耳自柵門抵靉河道中越小河
者凡三然皆一水數爲涉也

鴨綠江古馬訾水源出長白口與佟家江合流南入海至朝鮮義州府城

北分二流南行二十里復合焉西支在東支及黠河之中故稱中江

黠河發源黠陽鳳凰城分界山中東南在義州城北十里入江復有支流

南行約十里入江今城北入江之口漸淤淺水率南行支流遂成巨浸

志稱黠河出高麗蓋誤

柵外三十里有故城曰湯山城荆榛夾境猛獸藏焉不詳所始朝鮮呼湯

站城

東五里有古墓在山麓傳爲金家墳蓋鮮人之塚山半斷碑華表猶存東

有溫泉呼爲湯池

黠河西三里山下有廢城九相聯志稱爲鎮江城

鳳凰山麓有故石城一周十餘里設二門依山設險石堞具存相傳爲舊

鳳凰城朝鮮人呼之曰安市城考新唐書貞觀十九年四月勣濟遼水高麗皆嬰城守帝大享士帳幽州之南命長孫無忌誓師乃引而東勣攻拔蓋牟城卽其地建蓋州程名振攻沙卑城游兵鴨綠江上遂圍遼東城城潰卽其地建遼州進攻白崖城高麗將孫伐音降卽其地建嚴州進次安市攻未能下帝怒勅諸將攻之三日不克乃班師按蓋牟今蓋州遼州今遼陽沙卑今海城且延壽惠眞欲取烏骨度鴨綠迫其腹心長孫無忌謂安市十萬戶在吾後不如先破云云今此城最險計其地勢無不脗合當日兵機其爲安市城無疑至明一統志謂在蓋州城北其情勢則是轉戰而北矣殆誤

白巖通鑑綱目質實云未詳通志今之遼陽境考城內故屋址甚多有哨臺二但無水不可以居豈故有井而久廢耶又聞朝鮮人

云當日守城之將名楊萬春可補史缺

邊門所產草木鳥獸蟲魚大略與瀋城相同今撮其種之涉異足備考證者於左

人參一作人蔘生於山石巖下或山頂或溝澗陰處椴及茶條樹下春生葉如拳漸放如野芹中挺一箭而未茁其根大者葉亦大土人謂爲青草至夏則中箭直上箭端生小萼一叢作白花花落萼初圓尋作長形色始青浸變爲紅入伏時萼結子小者如萊菔子大者如豆形若腎色沃丹矣土人謂爲紅草至秋子落萼猶紅葉深碧土人謂爲黑草秋深始黃土人謂爲黃草其新產而未多歷年歲者止一極五葉斜生挺傍蓋中一葉傍分二葉下復有二小葉皆平列而不結萼俗呼一披又曰爬掌若二

極則對列生箭始結萼矣俗呼二夾披三極圍生而箭在中俗呼燈臺四極五

極皆然亦有一根生二挺各作三四極者大約根在土逾二三年始添一極極多則根始充實探得之後刷剔土泥於飯釜施秫箔加油紙蒸之曝炙乾焉油紙所餘之水積而煎膏可點服可貼瘍毒較葉膏勝按本草載參之產多不詳故備詢土人而錄其說

山家春夏交多斲藥苗爲蔬所呼則其俗名著錄可詳者歪脖菜杏葉菜沙參苗也鎗頭菜蒼朮苗也明葉菜桔梗苗也筆管菜黃精苗也小筆管菜蕨蕤苗也又有呼爲關東菜者視其根則是貫仲殆音近而譌呼之者其蒲公英萱草山丹則徧在田隴閒也

黃芩毒草也叢茂於陂澤作白花結小罌似蓮蓬含子如黍土人燒煙薰

齒痛頗效予館舍籬邊皆是按葦蓉爲本草所收而通志未載爰志以補之

蕨生邊外者較內地更肥美四月採其嫩莖漉以沸湯曝者色黑陰乾者色綠

季春村人皆擷小根菜爲食形如蒜而小按小根薤也南人呼爲澆頭生熟皆可食用糖醋拌食故久貯無二種通志分載之非是

河白菜生水畔沮洳中葉如玉簪而窄柔滑可食爲村人春季夏初之常菹乾之則色白

邊門有油松沙松二種皆無松子果松則產黟陽邊外按松之種類甚繁五鬣三鬣松身柏身古人止約略其梗概予宦遊多方所見地各異種

且皆有土呼名目卽松檜栝之分類亦不能確辨其是非鳳凰山所產沙松葉與枝猶是松狀但其本少直非若滇蜀之杉松其葉扁如杉卽東北邊外之果松乃松之結子者亦非都門所見皮青粉白之栝也其木則果松堅而勒油松堅而多脂沙松則殊輕脆也

木之實曰橡邊門樹之有橡者三種一名堅柞一名青剛柳一名胡薄羅按堅柞青剛柳當是一種巨細之分耳卽詩之柞也其胡薄羅葉大秋深極紅木堅而脆不可爲器薪而爲炭佳榭也一名櫟又名榭亦有不結實者通志謂不結實者爲械按爾雅械曰梭郭註梭小木叢生有刺實如耳璫紫赤可食是志言亦未確

東瓜木狀如柳皮青內赤色志稱堅而可爲研甚發墨

山榿出邊外者佳充貢棧亦較內地碩大

榆肉生老榆窟中色黃紫柔肥作蔬極美性固腎氣蓋木之精氣所結如

桃膠之類

高江村說府載夜光木生絕塞山閒積歲而朽夜有黑光遇雨益甚通體

皆明白如螢火迫之可以燭物歲之夏月余偶憶及詢之館舍炊爨之

役答言甚多踰戶卽攜數段以來蓋籬柵閒皆有之木腐處爲光故色

白與腐草爲螢之理同且日以水沃之入夜彌燦夏秋雨後有之春則

木乾而熄矣是以不可遠攜土人曰亮木

山中朽木可以承爇夏石之火俗謂之復有草如艾之狀揉治之亦佳殆

亦野艾之類俗名猪耳桑草憶滇尋甸州亦生野草其背有白毳毛以手擘之

卽成白線狀不假揉治乾之卽可爇亦異物也

灌莽中生小果如椹下有葉承之仲夏色正紅微酸季夏則深紅味甚甘名依爾哈木克國語也又曰普盤果復有生小果如豆而光潤味酸名山定子殆亦棠杜之類蜜漬之以充貢

輭棗藤本生小果狀如棗之中者內多細仁如麻色青味甘蜜漬亦美非本草所載牛奶柿一名君遷子也

鳳凰城所產鹿獐麇麇之屬皆遜東北邊外之肥腴然多有之夏至後亦多採鹿茸者鹿茸有二種遼瀋一帶者勝俗呼爲麇鹿木蘭所產者遜之俗呼爲馬鹿究竟鹿麇之辨本草所載旣未詳確諸方人各異其說也入藥則用麇鹿

馬鹿茸則遠販於邊門售之朝鮮人蓋利其質之碩直之廉而莫分良楛也

邊地猛獸如虎熊豹野豕之屬常有至邊內入村舍居人之善捕獵者曰呼

手亦利皮骨而往殮之然不多見惟聞三四歲前卒然熊大至遍村墟

憶昔人云熊爲能火詢之亦不然蓋山居不與城同而說部所傳亦未可盡信

今人呼蛙之背紫腹有凝脂者爲哈什嗎非是哈什嗎水中之介蟲也蝦頭六足形與田中之螻蛄相似而大首有二螯亦有膏如鱗土人以其狀與螻蛄相似則以拉蛄呼之拉蛄國語螻蛄之名也其紫背之蛙名楹普額爾赫清文鑑之注文甚悉其哈什嗎春月肥土人榨其漿煎如

腐色微紅而味鮮美

瀋城夏日已較關以西爲涼爽邊門依山臨水尤不甚酷暑惟晝多蠅蟲夜多蚊耳蠅則滿室白壁素箋往往點污蟲有大至盈寸者牲畜遭之立流血蚊不甚大而喙倍利聞今已稍減昔年爲尤甚云

蠶產山中木窟中土人往採之有積之數斗者生則如凝脂熟則色赤邊內水族鱗則鯽介則蟹皆多而美鱓有青鱓縵鱮也較內地者狀微細而長土人有呼爲蟲蟲魚則似鯽而狹唇倍厚蓋重唇也卽詩之鯈能吹沙行味亦佳

附朝鮮軼事

朝鮮寓內分爲八道其近中江爲驛使大路者曰平安道稍東南曰黃海

道黃海道之東曰京畿道國王都焉近王京而袤界西南曰忠清道忠

清道之東南直王京正南曰全羅道全羅道之東曰慶尙道慶尙道之

北在王京東南曰江源道江源道之北東互海西遶王京之北皆大山

不通行人山外東抵海西接平安道其地形袤而長曰咸鏡道

必由平安道始

可大抵平安黃海忠清全羅慶尙咸鏡皆濱海惟京畿江源二道在中

自王京南至海東至海皆約二千里北至海數百里西至邊門一千里

八道所屬皆有府府屬有縣縣隸於府而府自爲治如內地之直隸州

然

朝鮮東西南皆濱海其西北平安道與盛京接者以鴨綠江爲界其東北

咸鏡道與寧古塔接者以土們江爲界所謂會寧是也歲亦有馬市其

正北之界則直至長白之麓樹柵爲界長白山之東支最高峻鮮人呼爲白頭山

其自邊門赴王京之路一百里至義州府三十里至所串站五十里至龍川府三十里至鐵山縣五十里至宣州府四十里至郭山縣三十里至定州府六十里至嘉山縣五十里至安州府六十里至肅州府六十里至順安縣六十里至平壤府五十里至中和縣四十里至黃州府五十里至鳳山縣三十里至鉤水四十里至瑞興府五十里至葱秀站三十里至平山府七十里至金川縣四十里至開城府四十里至長湍縣四十里至碧蹄館四十里至紅州院十里至王京自義州城西十里江岸交界至王京計一千二百里

其每歲稱賀及謝恩之陪臣正使以王族之封君者儀賓之封都尉者或
政判書府官充之副使爲判書參判書狀官司憲府員下則皆鴻臚官
也若通官其階級亦不同大通官三員一謂之首堂其二謂之上判事
其官制正品秩三僉品秩四判官品秩五主簿品秩六以上謂之參下館有都提
調一以閣臣領之提調二以吏曹判書已行者參之

其學譯文者隸同文館有清漢蒙倭四學清文則捷解清語一書蒙文倭
文亦各有捷解漢文則初試以背四書成誦次卽學老乞大漢語一册

蓋元人所遺五倫全備四册明人所撰朴通事語一册彼國人所以習俚

語習則試以論序記呈文咨文中式然後命官焉

漢學設教誨二十三人兼充資咨官上判事十人兼充副使及書狀官之

大通官均謂之作廳猶堂上官之意也

其上判事係由眾員內考授教誨由上判事內考授教誨復考授首堂而司一切使命事充正使之大通官

若積有勞績則錫以一二三品散官以網巾繫繩之圈爲別三品用玉二品用金一品則圓玉朝鮮人重門閥朝官分兩班東班文官及要官也非世閥不能居其寒賤只得充武官雜官謂之西班尤重嫡庶貴臣庶子亦只充西班官

乾隆四十一年三月初五日朝鮮國王李昞薨遣陪臣報訃予諡莊順世孫祚襲位年二十五賚詔使臣爲副都統萬福內閣學士嵩貴

莊順王薨時年已八十四暮年衰疾國事皆相臣洪鳳漢掌握頗專擅其

弟麟漢爲次相更怙勢納賄傳言莊順未薨前二年有內禪意諸臣皆受命麟漢獨不行是以嗣王請封後卽正麟漢臯鳳漢因係母之父且無賄款幽禁而貸其死焉

莊順王次聳江城尉鄭姓早卒無嗣有養子厚謙憑其母之勢干預政事蓄逆謀嗣王誅之厚謙年二十八

莊順王二子長悻封世子早卒乾隆十年册次子愷爲世子於乾隆二十

七年殂以愷子祜繼悻後重嫡統也請封册爲世孫

傳曰世曠酒狂易
幽死故朝鮮之酒

禁甚嚴祜襲位乃請馳贈悻爲王謚思悼

箕子之後有箕氏韓氏鮮于氏高句驪之後高氏高麗之後王氏今朝鮮皆有其人至新羅之後爲金氏百濟之後爲朴氏其人最多今稱巨族

也

相傳高麗有安李
崔朴金鄭六大姓

丁酉春於邊門遇朝鮮謝恩回國者正使領中樞府事李澱副使禮曹判書徐浩修書狀官司憲府兼執義吳大益其賀正旦回國者正使錦城都尉朴明源副使吏曹判書鄭好仁書狀官司憲府兼執義申思運

乾隆四十二年孝聖皇太后上賓朝臣往頒遺誥朝鮮國王祘遣陪臣恭進陳慰表祭文貢沉香三兩芙蓉香二十枝花龍燭一對銀香盒一銅燭臺二代牲銀三百兩柿餅十則柏子黃栗銀杏大棗各十斗蜜十五斗及白面紙小紙白苧布白綿紬于五月十一日入邊正使吏曹判書鄭尙淳副使禮曹參判宋載經書狀官司憲府兼監察姜忱於本年八月十六日葺事出邊回國

其朝鮮國取士之制有大小二科小科初試詩賦次試經義四書疑復會試焉入格然後謂進士

中大科者爲及第試表策論賦復會試則科其一又有明經科則暗誦三經四書有遺亡舛誤者不入格

其試帖曰行詩七言十八句似古體叶平仄題命以經癸未年小科題賦

限三十句成篇

朝鮮字母凡十四類類十一階音尾九餘字四蓋二合三合四合以成音南漢山城在王京東四十里乃崇德間大兵破王京國王李倬率其妻孥退而自保之地

涓水在平壤城西南五十里

倭國在朝鮮慶尙道南海中其君稱天皇姓徐子與女皆可承繼而不與

聞國政秉國權者關白稱倭王姓源對馬島島長姓平蓋平秀吉族屬

之後人其國人通文教善擊劍尤精於火器而貪淫好殺瀆貨乃其天

性邇年頗貧困近朝鮮者皆仰朝鮮之粟布以給

按朱竹垞詩天皇之子娶於其族夫死

妻立兄死妹立子
死母立蓋普已然

倭國一切考試文案俱用漢文其人頗知向學惟其詩文墨守明人王李

之集自二家之外槩不入目竹垞詩話載朝鮮女子許景樊謂其篇章

句法宛然嘉靖七子之體疑爲贗鼎倭人今尙如是朝鮮又何爲不然

哉

聞明神宗時倭覆朝鮮有伎女忿恨欲刺倭酋爲所殺女名玉梅塚在平

安道往來人題詠甚多此亦可與見聞錄所載之瓊枝曼仙比烈矣

朝鮮亦有葉子戲割楮爲籤墨書其上凡八十爲八部曰人馬星獐兔魚

鳥山雞各自一至九而以皇乘極虎鷲龍鳳鷹爲魁領之列坐勻分迭

出而捉滅之較桌數爲勝負焉其捉例人鳥魚山雞以九捉八其四以

一捉二

朝鮮官員入覲至義州代商民攜貿易之鏹而抽什一以供行李之費曰

八包蓋沿明季使員各攜商蓐八包之名今制人不得踰三千兩

箕子故都平壤今有故井新羅都今慶尙道慶州百濟初都平壤後遷今

忠清道扶餘縣高句麗都平壤相傳麒麟屈乃朱蒙升仙處高麗今開

城府因建都之時一夜城外青松環生遂名其城曰松都其主山曰松

岳亦作元菟真番樂浪臨屯漢所置四郡也屬今江源咸鏡二道

朝鮮國尺如中國工部尺之尺有五寸斗如瀋陽斗三之一每瀋斗一斗

十衡如京市平庫平一百兩減二兩此其國度量衡之制也蓋其國之量猶去古未遠

其國以白麻白為白布以綿布為白木蓋謂木綿也以布之有直理壘起

者俗名搭喇布為交木謂緯綿相交也以黑豆為馬太乃其國語呼煙為南

草

乾隆四十二年十一月二十九日朝鮮使臣員役三百三十八人為年貢

謝恩詔并陳奏流謫參判洪述海之妻金氏及其子相格遣力士踰垣

入宮行刺事原表文封緘不可見詢其陪臣語言文字皆不足以盡其

詳且其始事之故言人人殊似有所諱隱第即其言附略於後洪啓禧

臣姓也官判書故生三子趾海官判書次卽述海次續海亦官參判趾海子相簡官承旨莊順王時與江城都尉之子鄭厚謙甚相暱王祘爲世孫時二人蓄意搖動之鄭復萌覬覦非分念相簡亦欲擁戴莊順王薨王祘二十七日諒陰畢言官發其前謀卽誅鄭而逮相簡相簡更冒言莊順兄終弟及之際亦多不正之謀因並誅相簡而流滴趾海兄弟金氏等怨望造逆謀連黨羽先陰結宮妾爲巫蠱今歲孟秋復以二千金購二力士攜椎佩刃入宮行刺因踏墜屋瓦爲王覺遁王戒心因潛移室八月十二日再入及寢未入室爲司門衛士所獲窮鞫得情且言推戴王季弟恩全君禛因族誅洪氏株連死者百餘人賜禛死年十七而人言洪相簡之死率多互異之詞祘遵雍正六年鮮國逆民稱兵王

戡定國亂入告故事具表上聞

祿
庶
長
兄
恩
彥
君
相
存
季
四
人
仲
兄
早
卒
今

歲幣二百八十六包內紙二百二十二包布五十包紬三包苧二包皮物

六包席子二包腰刀一包

方物一百四十四包內紙一百二十二包紬三包苧三包皮物一包筆墨

一包厚油紙一包

貢米六十八包

正使興祿大夫河恩君李堯副使吏曹判書李坤書狀官兼司憲府執義

李在學并咨送販米豆閩人曾金合等二十八名在黃海道風損舟檣

還中國

案朝鮮乃東裔大國久列藩服自漢以來雖攬代幾更而歷年皆久

遠至本朝荷再造之殊恩輸貢百年志稱東裔恭順乃其天性殆有然也其設官取士大約皆沿唐宋制惟是地不過中原一省而民貧賦重所產自紙布牛馬外絕無珍異邇年生口日煩故亦多告餒士子雖知讀書學無師承皆墨守訓詁一二聰穎之儔又往往好高務遠而無所別擇其詩體亦清婉而不知氣格凡朝覲之陪臣使者例不接見餘從員皆不甚讀書之人有所叩問率不能酬答姑就其所能知者書之於右

附朝鮮世系考

康獻王旦初名成桂元至元元年乙亥生明洪武二十五年壬申開國三十二年戊寅傳子恭定王永樂六年戊子薨年七十四廟號太祖

恭定王芳遠康獻王子元至正十七年丁酉生明洪武戊寅年嗣位庚辰

傳子禛永樂十七年己亥薨年六十三廟號定宗

世子禛恭定王子元至正二十七年丁未生明建文二年庚辰以世子攝

位四年壬子奏改禛爲世子永樂二十年壬寅薨年五十六追號太宗

莊憲王禔恭定王子洪武三十年丁丑生永樂十六年戊戌嗣位景泰元

年庚午薨年五十四廟號世宗

恭順王珣莊憲王子永樂十二年甲午生景泰元年庚午嗣位三年壬申

薨年三十九廟號文宗

王子鈞按明史作宏恭順王子正統六年辛酉生景泰元年攝位八年癸亥傳

叔莊惠王天順元年丁丑薨年十七廟號端宗

莊惠王孫莊憲王子永樂十五年丁酉生景泰六年乙亥嗣位成化四年

戊子薨年五十二廟號世祖

懷簡王暉莊惠王子正統三年戊午生天順元年丁丑薨年二十成化十

一年追封號德宗

襄悼王暉莊惠王子景泰元年庚午生成化四年戊子嗣位五年己丑薨

年二十廟號睿宗

康靖王娶懷簡王子天順元年丁丑生成化五年己丑嗣位宏治七年甲

寅薨年三十八廟號成宗

燕山君懼康靖王子□□□□□□□□宏治七年甲寅嗣位正德元年丙

寅傳位弟懌

恭僖王懌康靖王子宏治元年戊申生正德元年丙寅嗣位嘉靖二十三年薨年五十七廟號中宗

榮靖王皓恭僖王子正統十年乙亥生嘉靖二十三年甲辰嗣位二十四年乙巳薨年三十一廟號仁宗

恭憲王暉恭僖王子嘉靖十三年甲午生二十四年乙巳嗣位隆慶元年丁卯薨年三十四廟號明宗

昭敬王昫榮靖王子德興大院君昭第三子嘉靖三十一年壬子生隆慶元年丁卯嗣位萬曆三十六年戊申薨年五十七廟號宣祖

光海君瑋昭敬王子萬曆三十六年戊申權國事天啓二年癸亥爲國人

所廢

追封王琿昭敬王子萬曆六年庚辰生四十七年己未薨崇禎六年癸酉

追封號元宗

莊穆王侖元宗子萬曆二十三年乙未生天啓三年癸亥爲國人所立崇

德元年丙子受本朝封順治六年己丑薨年五十五國中自號仁宗

忠宣王溥莊穆王子萬曆四十七年己未生順治六年己丑嗣位十六年

己亥薨年四十一國中自號孝宗

莊恪王欄忠宣王子崇德五年辛巳生順治十六年己亥嗣位康熙十三

年甲寅薨年三十四國中自號顯宗

僖順王焯莊恪王子順治十八年辛丑生康熙十三年甲寅嗣位五十九

年庚子薨年六十國中自號肅宗

恪恭王昀僖順王子康熙二十七年戊辰生五十九年庚子嗣位雍正二
年甲辰薨年三十七國中自號景宗

莊順王昀僖順王子康熙三十三年甲戌生雍正二年甲辰嗣位乾隆四
十一年丙申薨年八十三國中自號英宗

恪愍王悻莊順王子乾隆四十一年丙申追封號眞宗

今繼王赫恪愍王子乾隆四十一年嗣位



